

श्रीऋषभदेवस्वामिने नमः ॥

श्रीशङ्खेश्वरपार्श्वनाथाय नमः ॥

श्रीअजितनाथस्वामिने नमः ॥

णमोऽत्थु णं समणस्स भगवओ महइमहावीरवद्धमाणसामिस्स ॥

श्रीगौतमस्वामिने नमः ॥ श्रीसद्गुरुदेवेभ्यो नमः ॥

पंचमगणहरभयवंसिरिसुहम्मसामिविरइयं तइयमंगं

## ठाणंगसुत्तं

पढमं अज्झयणं 'एगट्ठाणं'

॥ॐ नमो वीतरागाय ॥

१. सुयं मे आउसं ! तेणं भगवता एवमक्खायं — २. एगे आया ।
३. एगे दंडे । ४. एगा किरिया । ५. एगे लोए । एगे अलोए ।
६. एगे धम्मे । एगे अधम्मे । ७. एगे बंधे । एगे मोक्खे ।
८. एगे पुण्णे । एगे पावे । ९. एगे आसवे । एगे संवरे ।
१०. एगा वेयणा । एगा निज्जरा । ११. एगे जीवे पाडिक्कएणं सरीरएणं ।
१२. एगा जीवाणं अपरिआइत्ता विगुव्वणा ।
१३. एगे मणे । एगा वयी । एगे कायवायामे । १४. एगा उप्पा ।
१५. एगा वियती । १६. एगा वियच्चा । १७. एगा गती । एगा आगती ।
१८. एगे चयणे । एगे उव्वाए । १९. एगा तक्का । २०. एगा सन्ना ।
२१. एगा मन्ना । २२. एगा विन्नू । २३. एगा वेयणा । २४. एगे छेयणे ।
२५. एगे भेयणे । २६. एगे मरणे अंतिमसारीरियाणं ।
२७. एगे संसुद्धे अहाभूते पत्ते । २८. एगदुक्खे जीवाणं एगभूते ।
२९. एगा अहम्मपडिमा जं से आया परिकिलेसति ।
३०. एगा धम्मपडिमा जं से आया पज्जवजाए ।
३१. एगे मणे देवा-ऽसुर-मणुयाणं तंसि तंसि समयंसि ।
३२. एगा वती देवा-ऽसुर-मणुयाणं तंसि तंसि समयंसि ।
३३. एगे कायवायामे देवा-ऽसुर-मणुयाणं तंसि तंसि समयंसि ।

३४. एगे उट्ठाण-कम्म-बल-वीरिय-पुरिसकार-परक्कमे देवा-ऽसुर मणुयाणं तंसि तंसि समयंसि ।
३५. एगे नाणे । एगे दंसणे । एगे चरित्ते । ३६. एगे समए । एगे पएसे । एगे परमाणू ।
३७. एगा सिद्धी । एगे सिद्धे । एगे परिनिव्वाणे । एगे परिनिव्वुडे ।
३८. एगे सदे । एगे रूवे । एगे गंधे । एगे रसे । एगे फासे । एगे सुब्भिसदे । एगे दुब्भिसदे । एगे सुरूवे । एगे दुरूवे ।  
एगे दीहे । एगे रहस्से । एगे वट्टे । एगे तंसे । एगे चउरंसे । एगे पिहुले ।  
एगे पंरमंडले ।  
एगे किण्हे । एगे णीले । एगे लोहिते । एगे हालिदे । एगे सुक्किले ।  
एगे सुब्भिंगंधे । एगे दुब्भिंगंधे ।  
एगे तित्ते । एगे कडुए । एगे कसाए । एगे अंबिले । एगे महुरे ।  
एगे कक्खडे जाव लुक्खे ।
३९. एगे पाणातिवाए जाव एगे परिग्गहे । एगे कोधे जाव लोभे । एगे पेजे, एगे दोसे जाव एगे परपरिवाए । एगा अरतिरती । एगे मायामोसे । एगे मिच्छादंसणसल्ले ।  
एगे पाणातिवायवेरमणे जाव परिग्गहवेरमणे । एगे कोधविवेगे जाव मिच्छादंसणसल्लविवेगे ।
४०. एगा ओसप्पिणी, एगा सुसमसुसमा जाव एगा दूसमदूसमा । एगा उस्सप्पिणी, एगा दुस्समदुस्समा जाव एगा सुसमसुसमा ।
४१. (१) एगा नेरइयाणं वग्गणा, एगा असुरकुमाराणं वग्गणा, चउवीसादंडओ जाव एगा वेमाणियाणं वग्गणा ।  
(२) एगा भवसिद्धीयाणं वग्गणा, एगा अभवसिद्धीयाणं वग्गणा । एगा भवसिद्धीयाणं णेरतियाणं वग्गणा एगा अभवसिद्धीयाणं णेरतियाणं वग्गणा, एवं जाव एगा भवसिद्धीयाणं वेमाणियाणं वग्गणा, एगा अभवसिद्धीयाणं वेमाणियाणं वग्गणा ।

(३) एगा सम्मदिट्ठीयाणं वग्गणा, एगा मिच्छदिट्ठीयाणं वग्गणा, एगा सम्ममिच्छदिट्ठीयाणं वग्गणा । एगा सम्मदिट्ठीयाणं णेरइयाणं वग्गणा, एगा मिच्छदिट्ठीयाणं णेरइयाणं वग्गणा, एगा सम्ममिच्छदिट्ठियाणं णेरइयाणं वग्गणा, एवं जाव थणितकुमाराणं वग्गणा । एगा मिच्छदिट्ठियाणं पुढविकाइयाणं वग्गणा, एवं जाव वणस्सतिकाइयाणं । एगा सम्मदिट्ठियाणं बेइंदियाणं वग्गणा, एगा मिच्छदिट्ठियाणं बेइंदियाणं वग्गणा, एवं तेइंदियाण वि चउरिंदियाण वि, सेसा जहा नेरइया जाव एगा सम्ममिच्छदिट्ठियाणं वेमाणियाणं वग्गणा ।

(४) एगा कण्हपक्खियाणं वग्गणा, एगा सुक्कपक्खियाणं वग्गणा । एगा कण्हपक्खियाणं णेरइयाणं वग्गणा, एगा सुक्कपक्खियाणं णेरइयाणं वग्गणा, एवं चउवीसादंडओ भाणियव्वो ।

(५) एगा कण्हलेसाणं वग्गणा, एगा नीललेसाणं वग्गणा, एवं जाव सुक्कलेसाणं वग्गणा । एगा कण्हलेसाणं नेरइयाणं वग्गणा जाव काउलेसाणं णेरइयाणं वग्गणा, एवं जस्स जति लेसाओ, भवणवइ-वाणमंतर-पुढवि-आउवणस्सइकाइयाणं च चत्तारि लेसाओ, तेउ-वाउ-बेइंदिय-तेइंदिअ-चउरिंदियाणं तिन्नि लेसाओ, पंचिंदियतिरिक्खजोणियाणं मणुस्साणं छ लेस्साओ, जोतिसियाणं एगा तेउलेसा, वेमाणियाणं तिन्नि उवरिमलेसाओ ।

(६) एगा कण्हलेसाणं भवसिद्धियाणं वग्गणा, एगा कण्हलेसाणं अभवसिद्धियाणं वग्गणा, एवं छसु वि लेसासु दो दो पयाणि भाणियव्वाणि । एगा कण्हलेसाणं भवसिद्धियाणं नेरइयाणं वग्गणा, एगा कण्हलेसाणं अभवसिद्धियाणं णेरइयाणं वग्गणा, एवं जस्स जति लेसाओ तस्स तसि भाणियव्वाओ जाव वेमाणियाणं ।

(७) एगा कण्हलेसाणं सम्मदिट्ठियाणं वग्गणा, एगा कण्हलेसाणं मिच्छदिट्ठियाणं वग्गणा, एगा कण्हलेसाणं सम्ममिच्छदिट्ठियाणं वग्गणा, एवं छसु वि लेसासु जाव वेमाणियाणं जेसिं जति दिट्ठीओ ।

(८) एगा कण्हलेसाणं कण्हपक्खियाणं वग्गणा, एगा कण्हलेसाणं सुक्खपक्खियाणं वग्गणा, जाव वेमाणियाणं, जस्स जति लेसाओ । एए अट्ठ चउवीसदंडया ।

४२. एगा तित्थसिद्धाणं वग्गणा, एगा अतित्थसिद्धाणं वग्गणा, एवं जाव एगा एक्कसिद्धाणं वग्गणा, एगा अणेक्कसिद्धाणं वग्गणा । एगा पढमसमयसिद्धाणं वग्गणा एवं जाव अणंतसमयसिद्धाणं वग्गणा ॥
४३. (१) एगा परमाणुपोग्गलाणं वग्गणा, एवं जाव एगा अणंतपएसियाणं पोग्गलाणं वग्गणा १। एगा एगपदेसोगाढाणं पोग्गलाणं वग्गणा जाव एगा असंखेज्जपदेसोगाढाणं पोग्गलाणं वग्गणा २। एगा एगसमयट्ठितियाणं पोग्गलाणं वग्गणा जाव असंखेज्जसमयट्ठितियाणं पोग्गलाणं वग्गणा ३। एगा एगगुणकालगाणं पोग्गलाणं वग्गणा जाव एगा असंखेज्जगुणकालगाणं पोग्गलाणं वग्गणा, एगा अणंतगुणकालगाणं पोग्गलाणं वग्गणा । एवं वण्ण-गंध-रस-फासा भाणियव्वा जाव एगा अणंतगुणलुक्खाणं पोग्गलाणं वग्गणा ४।
- (२) एगा जहन्नपतेसियाणं खंधाणं वग्गणा, एगा उक्कस्सपतेसियाणं खंधाणं वग्गणा, एगा अजहन्नुक्कस्सपतेसियाणं खंधाणं वग्गणा १, एवं जहन्नोगाहणगाणं उक्कस्सोगाहणगाणं अजहन्नुक्कस्सोगाहणगाणं २, जहन्नट्ठितियाणं उक्कस्सट्ठितियाणं अजहन्नुक्कस्सट्ठितियाणं ३, जहन्नगुणकालगाणं उक्कस्स-गुणकालगाणं अजहन्नुक्कस्सगुणकालगाणं, एवं वण्ण-गंध-रस-फासाणं वग्गणा भाणियव्वा, जाव एगा अजहन्नुक्कस्सगुणलुक्खाणं पोग्गलाणं वग्गणा ४।
४४. एगे जंबुद्दीवे दीवे सव्वदीवसमुद्दाणं जाव अब्ढंगुलगं च किंचिविसेसाधिए परिकखेवेणं ।
४५. एगे समणे भगवं महावीरे इमीसे ओसप्पिणीए चउव्वीसाए तित्थगराणं चरिमतित्थगरे सिद्धे बुद्धे मुत्ते जाव सव्वदुक्खप्पहीणे ।
४६. अणुत्तरोववातिया णं देवा णं एगं रतणिं उट्ठंउच्चत्तेणं पन्नत्ता ।
४७. अद्दाणक्खत्ते एगतारे पन्नत्ते । चित्ताणक्खत्ते एगतारे पन्नत्ते । सातीणक्खत्ते एगतारे पन्नत्ते ।
४८. एगपदेसोगाढा पोग्गला अणंता पन्नत्ता, एवमेगसमयट्ठितिया । एगगुणकालगा पोग्गला अणंता पन्नत्ता, जाव एगगुणलुक्खा पोग्गला अणंता पन्नत्ता ।
- ॥ एगट्ठाणं समत्तं ॥

बीयं अज्झयणं 'बिड्डाणं'

(पढमो उद्देसओ)

४९. जदत्थि णं लोगे तं सव्वं दुपओआरं, तंजहा-जीवच्चेव अजीवच्चेव ।

(१) तसच्चेव थावरच्चेव १, सजोणियच्चेव अजोणियच्चेव २, साउयच्चेव अणाउयच्चेव ३, सइंदियच्चेव, अणिंदियच्चेव ४, सवेयगा चेव अवेयगा चेव ५, सरूवि चेव अरूवि चेव ६, सपोग्गला चेव अपोग्गला चेव ७, संसारसमावन्नगा चेव असंसारसमावन्नगा चेव ८, सासया चेव असासया चेव ९।

(२) आगासे चेव, नो आगासे चेव । धम्मे चेव अधम्मे चेव । बंधे चेव मोक्खे चेव । पुत्ते चेव पावे चेव । आसवे चेव संवरे चेव । वेयणा चेव निज्जरा चेव ।

५०. दो किरियाओ पन्नत्ताओ, तंजहा-जीवकिरिया चेव अजीवकिरिया चेव । जीवकिरिया दुविहा पन्नत्ता, तंजहा-सम्मत्तकिरिया चेव, मिच्छत्तकिरिया चेव । अजीवकिरिया दुविहा पन्नत्ता, तंजहा-इरियावहिया चेव संपराइगा चेव ।

दो किरियाओ पन्नत्ताओ तंजहा-काइया चेव आधिकरणिया चेव । काइया किरिया दुविहा पन्नत्ता, तंजहा-अणुवरयकायकिरिया चेव दुप्पउत्तकायकिरिया चेव । आधिकरणिया किरिया दुविहा पन्नत्ता, तंजहा-संजोयणाधिकरणिया चेव णिब्वत्तणाधिकरणिया चेव ।

दो किरियाओ पन्नत्ताओ, तंजहा-पाओसिया चेव पारियावणिया चेव । पातोसिया किरिया दुविहा पन्नत्ता, तंजहा-जीवपाओसिया चेव अजीवपाओसिया चेव । पारियावणिया किरिया दुविहा पन्नत्ता, तंजहा-सहत्थपारियावणिया चेव परहत्थपारियावणिया चेव ।

दो किरियाओ पन्नत्ताओ, तंजहा-पाणातिवायकिरिया चेव अपच्चक्खाणकिरिया चेव । पाणातिवायकिरिया दुविहा पन्नत्ता, तंजहा-सहत्थपाणातिवायकिरिया चेव परहत्थपाणातिवायकिरिया चेव । अपच्चक्खाणकिरिया दुविहा पन्नत्ता, तंजहा-जीवअपच्चक्खाणकिरिया चेव अजीवअपच्चक्खाणकिरिया चेव ।

दो किरियाओ पन्नत्ताओ, तंजहा-आरंभिया चेव पारिगहिया चेव ।  
आरंभिया किरिया दुविहा पन्नत्ता, तंजहा-जीवआरंभिया चेव अजीवआरंभिया  
चेव । एवं पारिगहिया वि ।

दो किरियाओ पन्नत्ताओ, तंजहा-मायावत्तिया चेव मिच्छादंसणवत्तिया  
चेव । मायावत्तिया किरिया दुविहा पन्नत्ता, तंजहा-आयभाववंकणता चेव  
परभाववंकणता चेव । मिच्छादंसणवत्तिया किरिया दुविहा पन्नत्ता, तंजहा-  
ऊणाइरित्तमिच्छादंसणवत्तिया चेव तव्वइरित्तमिच्छादंसणवत्तिया चेव ।

दो किरियाओ पन्नत्ताओ, तंजहा-दिट्ठिया चेव पुट्ठिया चेव । दिट्ठिया  
किरिया दुविहा पन्नत्ता, तंजहा-जीवदिट्ठिया चेव अजीवदिट्ठिया चेव । एवं पुट्ठिया  
वि ।

दो किरियाओ पन्नत्ताओ, तंजहा-पाडुच्चिया चेव सामंतोवणिवाइया चेव ।  
पाडुच्चिया किरिया दुविहा पन्नत्ता, तंजहा-जीवपाडुच्चिया चेव अजीवपाडुच्चिया  
चेव । एवं सामंतोवणिवाइया वि ।

दो किरियाओ पन्नत्ताओ, तंजहा-साहत्थिया चेव णेसत्थिया चेव ।  
साहत्थिया किरिया दुविहा पन्नत्ता, तंजहा-जीवसाहत्थिया चेव अजीवसाहत्थिया  
चेव । एवं णेसत्थिया वि ।

दो किरियाओ पन्नत्ताओ, तंजहा-आणवणिया चेव वेतारणिया चेव, जहेव  
णेसत्थिया ।

दो किरियाओ पन्नत्ताओ, तंजहा-अणाभोगवत्तिया चेव अणवकंखवत्तिया  
चेव । अणाभोगवत्तिया किरिया दुविहा पन्नत्ता, तंजहा-अणाउत्तआइयणता चेव  
अणाउत्तपमज्जणता चेव । अणवकंखवत्तिया किरिया दुविहा पन्नत्ता, तंजहा-  
आयसरीरअणवकंखवत्तिया चेव परसरीरअणवकंखवत्तिया चेव ।

दो किरियाओ पन्नत्ताओ, तंजहा-पिज्जवत्तिया चेव दोसवत्तिया चेव ।  
पेज्जवत्तिया किरिया दुविहा पन्नत्ता, तंजहा-मायावत्तिया चेव लोभवत्तिया चेव ।  
दोसवत्तिया किरिया दुविहा पन्नत्ता, तंजहा-कोहे चेव माणे चेव ।

५१. दुविहा गरिहा पन्नत्ता, तंजहा-मणसा वेगे गरहति, वयसा वेगे गरहति ।

अहवा गरहा दुविहा पन्नत्ता, तंजहा-दीहं पेगे अद्धं गरहति, रहस्सं पेगे अद्धं गरहति ।

५२. दुविहे पच्चक्खाणे पन्नत्ते, तंजहा-मणसा वेगे पच्चक्खाति, वयसा वेगे पच्चक्खाति ।

अहवा पच्चक्खाणे दुविहे पन्नत्ते, तंजहा-दीहं पेगे अद्धं पच्चक्खाति, रहस्सं पेगे अद्धं पच्चक्खाति ।

५३. दोहिं ठाणेहिं अणगारे संपन्ने अणादीयं अणवयगं दीहमद्धं चाउरंतसंसारकंतरं वीतिवतेज्जा, तंजहा-विज्जाए चेव चरणेण चेव ।

५४. दो ठाणाइ अपरियाणित्ता आया णो केवलिपन्नत्तं धम्मं लभेज्ज सवणयाए, तंजहा-आरंभे चेव परिग्गहे चेव १। दो ठाणाइं अपरियाणित्ता आया णो केवलं बोधिं बुज्जेज्जा, तंजहा-आरंभे चेव परिग्गहे चेव २। दो ठाणाइं अपरियाइत्ता आया नो केवलं मुंडे भवित्ता अगाराओ अणगारियं पव्वएज्जा, तंजहा-आरंभे चेव परिग्गहे चेव ३। एवं णो केवलं बंभचेरवासमावसेज्जा ४, णो केवलेणं संजमेणं संजमेज्जा ५, नो केवलेणं संवरेणं संवरेज्जा ६, नो केवलमाभिणिबोधियणाणं उप्पाडेज्जा ७, एवं, सुयनाणं ८, ओहिनाणं ९, मणपज्जवनाणं १०, केवलनाणं ११।

५५. दो ठाणाइं परियाइत्ता आया केवलिपन्नत्तं धम्मं लभेज्ज सवणयाए, तंजहा-आरंभे चेव परिग्गहे चेव, एवं जाव केवलनाणमुप्पाडेज्जा ।

दोहिं ठाणेहिं आया केवलिपन्नत्तं धम्मं लभेज्ज सवणयाए, तंजहा-सोच्चच्चेव अभिसमेच्चच्चेव जाव केवलनाणं उप्पाडेज्जा ।

५६. दो समाओ पन्नत्ताओ, तंजहा-ओसप्पिणी समा चेव उस्सप्पिणी समा चेव ।

५७. दुविहे उम्माए पन्नत्ते, तंजहा-जक्खावेसे चेव, मोहणिज्जस्स चेव कम्मस्स उदएणं । तत्थ णं जे से जक्खावेसे से णं सुहवेयतराए चेव सुहविमोयतराए चेव । तत्थ णं जे से मोहणिज्जस्स कम्मस्स उदएणं से णं दुहवेयतराए चेव दुहविभोयतराए चेव ।

५८. दो दंडा पन्नत्ता, तंजहा-अट्ठादंडे चेव अणट्ठादंडे चेव, नेरइयाणं दो दंडा

पन्नत्ता, तंजहा-अट्टादंडे य अणट्टादंडे, य । एवं चउवीसादंडओ जाव वेमाणियाणं ।

५९. दुविहे दंसणे पन्नत्ते, तंजहा-सम्मदंसणे चेव मिच्छादंसणे चेव १। सम्मदंसणे दुविहे पन्नत्ते, तं जहा-णिसग्गसम्मदंसणे चेव अभिगमसम्मदंसणे चेव २। णिसग्गसम्मदंसणे दुविहे पन्नत्ते, तंजहा-पडिवाति चेव अपडिवाति चेव ३। अभिगमसम्मदंसणे दुविहे पन्नत्ते, तंजहा-पडिवाति चेव अपडिवाति चेव ४। मिच्छादंसणे दुविहे पन्नत्ते, तंजहा-अभिगहियमिच्छादंसणे चेव अणभिगहियमिच्छादंसणे चेव ५। अभिगहियमिच्छादंसणे दुविहे पन्नत्ते, तंजहा-सपज्जवसिते चेव अपज्जवसिते चेव ६। एवमणभिगहितमिच्छादंसणे वि ७।

६०. दुविहे नाणे पन्नत्ते, तंजहा-पच्चक्खे चेव परोक्खे चेव १। पच्चक्खे नाणे दुविहे पन्नत्ते, तंजहा-केवलनाणे चेव णोकेवलनाणे चेव २। केवलनाणे दुविहे पन्नत्ते, तंजहा-भवत्थकेवलनाणे चेव सिद्धकेवलनाणे चेव ३। भवत्थकेवलनाणे दुविहे पन्नत्ते, तंजहा-सजोगिभवत्थकेवलनाणे चेव, अजोगिभवत्थकेवलनाणे चेव ४। सजोगिभवत्थकेवलनाणे दुविहे पन्नत्ते, तंजहा-पढमसमयसजोगिभवत्थकेवलनाणे चेव अपढमसमयसजोगिभवत्थकेवलनाणे चेव ५। अहवा चरिमसमयसजोगिभवत्थकेवलनाणे चेव अचरिमसमयसजोगिभवत्थकेवलनाणे चेव ६। एवं अजोगिभवत्थकेवलनाणे वि ७-८। सिद्धकेवलनाणे दुविहे पन्नत्ते, तंजहा-अणंतरसिद्धकेवलनाणे चेव परंपरसिद्धकेवलनाणे चेव ९। अणंतरसिद्धकेवलनाणे दुविहे पन्नत्ते, तंजहा-एक्काणंतरसिद्धकेवलनाणे चेव अणेक्काणंतरसिद्धकेवलनाणे चेव १०। परंपरसिद्धकेवलनाणे दुविहे पन्नत्ते तंजहा-एक्कपरंपरसिद्धकेवलनाणे चेव अणेक्कपरंपरसिद्धकेवलनाणे चेव ११। णोकेवलनाणे दुविहे पन्नत्ते, तंजहा-ओहिणाणे चेव मणपज्जवणाणे चेव १२। ओहिणाणे दुविहे पन्नत्ते, तंजहा-भवपच्चइए चेव खतोवसमिते चेव १३। दोण्हं भवपच्चइए पन्नत्ते, तंजहा-देवामं चेव नेरइयाणं चेव १४। दोण्हं खओवसमिते पन्नत्ते, तंजहा-मणुस्साणं चेव पंचिंदियतिरिक्खजोणियाणं



चेव १५। मणपज्जवणाणे दुविहे पन्नत्ते, तंजहा-उज्जुमति चेव विउलमति चेव १६। परोक्खे णाणे दुविहे पन्नत्ते, तंजहा-आभिणिबोहियणाणे चेव सुयनाणे चेव १७। अभिणिबोहियणाणे दुविहे पन्नत्ते, तंजहा-सुतनिस्सिते चेव असुतनिस्सिते चेव १८। सुतनिस्सिते दुविहे पन्नत्ते, तंजहा-अत्थोग्गहे चेव वंजणोग्गहे चेव १९। असुयनिस्सिते वि एमेव २०। सुयनामे दुविहे पन्नत्ते, तंजहा-अंगपविट्ठे चेव अंगबाहिरे चेव २१। अंगबाहिरे दुविहे पन्नत्ते, तंजहा-आवस्सए चेव आवस्सयवतिरित्ते चेव २२। आवस्सयवतिरित्ते दुविहे पन्नत्ते, तंजहा-कालिते चेव उक्कालिते चेव २३।

६१. दुविहे धम्मे पन्नत्ते, तंजहा-सुयधम्मे चेव चरित्तधम्मे चेव । सुयधम्मे दुविहे पन्नत्ते, तंजहा-सुत्तसुयधम्मे चेव अत्थसुयधम्मे चेव । चरित्तधम्मे दुविहे पन्नत्ते, तंजहा-अणारचरित्तधम्मे चेव अणारचरित्तधम्मे चेत्त ।

६२. दुविहे संजमे पन्नत्ते, तंजहा-सरागसंजमे चेव वीयरगसंजमे चेव ।

सरागसंजमे दुविहे पन्नत्ते, तंजहा-सुहुमसंपरायसरागसंजमे चेव बादरसंपरायसरागसंजमे चेव ।

सुहुमसंपरायसरागसंजमे दुविहे पन्नत्ते, तंजहा-पढमसमयसुहुम-संपरायसरागसंजमे चेव अपढमसमयसुहुमसंपरायसरागसंजमे चेव, अथवा चरमसमयसुहुमसंपरायसरागसंजमे चेव अचरिमसमयसुहुमसंपरायसरागसंजमे चेव । अथवा सुहुमसंपरायसरागसंजमे दुविहे पन्नत्ते, तंजहा-संक्किलेसमाणते चेव विसुज्झमाणते चेव ।

बादरसंपरायसरागसंजमे दुविहे पन्नत्ते, तंजहा-पढमसमयबादर-संपरायसरागसंजमे चेव अपढमसमयबादरसंपरायसरागसंजमे चेव । अहवा चरिमसमयबादरसंपरायसरागसंजमे चेव अचरिमसमयबादरसंपरायसरागसंजमे चेव । अहवा बायरसंपरायसरागसंजमे दुविधे पन्नत्ते, तंजहा-पडिवाति चेव अपडिवाति चेव ।

वीयरगसंजमे दुविधे पन्नत्ते, तंजहा-उवसंतकसायवीयरगसंजमे चेव खीणकसायवीतरगसंजमे चेव ।

उवसंतकसायवीयरागसंजमे दुविहे पन्नत्ते, तंजहा-पढमसमयउवसंत-  
कसायवीतरागसंजमे चेव अपढसमयउवसंतकसायवीतरागसंजमे चेव । अहवा  
चरिमसमयउवसंतकसायवीतरागसंजमे चेव अचरिमसमयउवसंतकसायवीतरागसंजमे  
चेव ।

खीणकसायवीतरागसंजमे दुविहे पन्नत्ते, तंजहा-छउमत्थखीणक-  
सायवीतरागसंजमे चेव कैवलिखीणकसायवीयरागसंजमे चेव ।

छउमत्थखीणकसायवीयरागसंजमे दुविहे पन्नत्ते, तंजहा-संयबुद्धछउमत्थ-  
खीणकसायवीयरागसंजमे चेव बुद्धबोधियछउमत्थखीणकसायवीयरागसंजमे चेव ।  
संयबुद्धछउमत्थखीणकसायवीयरागसंजमे दुविहे पन्नत्ते, तंजहा-पढमसमय-  
संयबुद्धछउमत्थखीणकसायवीयरागसंजमे चेव अपढमसमयसंयबुद्धछ-  
उमत्थखीणकसायवीयरागसंजमे चेव, अहवा चरिमसमयसंयबुद्धछ-  
उमत्थखीणकसायवीयरागसंजमे चेव अचरिमसमयसंयबुद्धछउमत्थखीणक-  
सायवीयरागसंजमे चेव । बुद्धबोधियछउमत्थखीणकसायवीयरागसंजमे दुविहे पन्नत्ते,  
तंजहा-पढमसमयबुद्धबोधियछउमत्थखीणकसायवीयरागसंजमे चेव अपढ-  
मसमयबुद्धबोधियछउमत्थखीणकसायवीयरागसंजमे चेव, अहवा चरिमसमयबुद्ध-  
बोधियछउमत्थखीणकसायवीयरागसंजमे चेव अचरिमसमयबुद्धबोधि-  
यखीणकसायवीयरागसंजमे चेव ।

केवलिखीणकसायवीतरागसंजमे दुविहे पन्नत्ते, तंजहा-सजोगिकेवलि-  
खीणकसायवीतरागसंजमे चेव अजोगिकेवलिखीणकसायवीतरागसंजमे चेव ।

सजोगिकेवलिखीणकसायवीयरागसंजमे दुविहे पन्नत्ते, तंजहा-  
पढमसमयसजोगिकेवलिखीणकसायवीयरागसंजमे चेव अपढमसमयस-  
जोगिकेवलिखीणकसायवीयरागसंजमे चेव । अहवा चरिमसमयसजोगि-  
केवलिखीणकसायवीयरागसंजमे चेव अचरिमसमयसजोगिकेवलिखीणक-  
सायरागसंजमे चेव ।

अजोगिकेवलिखीणकसायवीयरागसंजमे दुविहे पन्नत्ते, तंजहा-  
पढमसमयअजोगिकेवलिखीणकसायवीयरागसंजमे चेव अपढमसमयअजोगि-  
केवलिखीणकसायवीयरागसंजमे चेव । अहवा चरिमसमयअजोगिकेवलि-

खीणकसायवीयरागसंजमे चेव अचरिमसमयअजोगिकेवलिखीणकसाय-  
वीयरागसंजमे चेव ।

६२. दुविहा पुढविकाइया पन्नत्ता, तंजहा-सुहुमा चेव बायरा चेव १। एवं जाव  
दुविहा वणस्सतिकाइया पन्नत्ता, तंजहा-सुहुमा चेव बायरा चेव ५।

दुविहा पुढविकाइया पन्नत्ता, तंजहा-पज्जत्तगा चेव अपज्जत्तगा चेव ६।  
एवं जाव वणस्सतिकाइया १०।

दुविहा पुढविकाइया पन्नत्ता, तंजहा-परिणता चेव अपरिणता चेव ११,  
एवं जाव वणस्सतिकाइया १५। दुविहा दव्वा पन्नत्ता, तंजहा-परिणता चेव  
अपरिणता चेव १६।

दुविहा पुढविकाइया पन्नत्ता, तंजहा-गतिसमावन्नगा चेव अगतिसमावन्नगा  
चेव १७, एवं जाव वणस्सतिकाइया २१। दुविहा दव्वा पन्नत्ता, तंजहा-  
गतिसमावन्नगा चेव अगतिसमावन्नगा चेव २२।

दुविहा पुढविकाइया पन्नत्ता, तंजहा-अणंतरोगाढगा चेव परंपरोगाढगा चेव  
२३, जाव दव्वा २८।

६४. दुविधे काले पन्नत्ते, तंजहा-ओसप्पिणीकाले चेव उस्सप्पिणीकाले चेव ।

दुविधे आगासे पन्नत्ते, तंजहा-लोगागासे चेव अलोगागासे चेव ।

६५. णेरइयाणं दो सरीरगा पन्नत्ता, तंजहा-अब्भंतरगे चेव बाहिरगे चेव ।

अब्भंतरगे कम्मए, बाहिरगे वेउव्विए । एवं देवाणं भामियव्वं ।

पुढविकाइयाणं दो सरीरगा पन्नत्ता, तंजहा-अब्भंतरगे चेव बाहिरगे चेव ।  
अब्भंतरगे कम्मए, बाहिरगे ओरालिगे । जाव वणस्सइकाइयाणं ।

बेइंदियाणं दो सरीरगा पन्नत्ता, तंजहा-अब्भंतरगे चेव बाहिरगे चेव ।  
अब्भंतरगे कम्मए, अट्ठि-मंससोणितबद्धे बाहिरगे ओरालिए । जाव चउरिंदियाणं ।

पंचिंदियतिरिक्खजोणियाणं दो सरीरगा पन्नत्ता, तंजहा-अब्भंतरगे चेव  
बाहिरगे चेव । अब्भंतरगे कम्मए, अट्ठि-मंस-सोणिय-ण्हारु-छिराबद्धे बाहिरगे  
ओरालिए । मणुस्साणं वि एवं चेव ।

विग्गहगतिसमावन्नगाणं नेरइयाणं दो सरीरगा पन्नत्ता, तंजहा-तेयते चेव  
कम्मते चेव । निरंतरं जाव वेमाणियाणं ।

नेरइयाणं दोहिं ठाणेहिं सरीरुप्पत्ती सिया, तंजहा-रागेण चेव दोसेण चेव ।  
जाव वेमाणियाणं ।

नेरइयाणं दुट्ठाणनिव्वत्तिए सरीरगे पन्नत्ते, तंजहा-रागनिव्वत्तिए चेव  
दोसनिव्वत्तिए चेव । जाव वेमाणियाणं ।

दो काया पन्नत्ता, तंजहा-तसकाए चेव थावरकाए चेव । तसकाए दुविहे  
पन्नत्ते, तंजहा-भवसिद्धिए चेव अभवसिद्धिए चेव । एवं थावरकाए वि ।

६६. दो दिसाओ अभिगिज्झ कप्पति णिगंथाण वा णिगंथीण वा पव्वावित्तए-  
पाईणं चेव उदीणं चेव । एवं मुंडावित्तए, सिक्खावित्तए, उवट्ठावित्तए,  
संभुंजित्तए, संवसित्तए, सज्झायमुदिसित्तए, सज्झायं समुद्धिसित्तए,  
सज्झायमणुजाणित्तए, आलोइत्तए, पडिक्कमित्तए, निंदितए, गरहित्तए,  
विउट्ठित्तए, विसोहित्तए, अकरणयाए अब्भुट्ठित्तए, अंहारिहं पायच्छित्तं  
तवोकम्मं पडिवज्जित्तए ।

दो दिसातो अभिगिज्झ कप्पति णिगंथाण वा णिगंथीण वा अपच्छि-  
ममारणंतियसंलेहणाजूसणाझूसिताणं भत्तपाणपडियाइक्खिताणं पाओवगताणं  
कालं अणवकंखमाणानं विहरित्तए, तंजहा-पाईणं चेव उदीणं चेव ।

॥ बिट्ठाणस्स पढमो उद्देसओ समत्तो ॥

(बीओ उद्देसओ)

६७. जे देवा उट्ठोववन्नगा कप्पोववन्नगा विमाणोववन्नगा चारोववन्नगा चारट्ठितीया  
गतिरतिया गतिसमावन्नगा तेसि णं देसाणं सता समितं जे पावे कम्मे  
कज्जति तत्थगता वि एगतिया वेदणं वेदेंति, अन्नत्थगता वि एगतिया वेयणं  
वेदेंति ।

णेरइयाणं सता समियं जे पावे कम्मे कज्जति तत्थगता वि एगतिया वेयणं  
वेदेंति अन्नत्थगता वि एगतिता वेयणं वेदेंति, जाव पंचेंदियतिरिक्खजोणियाणं ।  
मणुस्साणं सता समितं जे पावे कम्मे कज्जति इहगता वि एगतिता वेयणं

वेयंति, अन्नत्थगता वि एगतिया वेयणं वेयंति । मणुस्सवज्जा सेसा एक्कगमा ।  
 ६८. नेरइया दुगतिया दुयागतिया पन्नत्ता, तंजहा-नेरइए नेरइएसु उववज्जमाणे  
 मणुस्सेहिंतो वा पंचेंदियतिरिक्खजोणिएहिंतो वा उववज्जेज्जा, से चेव णं  
 से नेरइए णेरइयत्तं विप्पजहमाणे मणुस्सत्ताए वा पंचेंदियतिरिक्खजोणियत्ताए  
 वा गच्छेज्जा । एवं असुरकुमारा वि, णवरं से चेव णं से असुरकुमारे  
 असुरकुमारत्तं विप्पजहमाणे मणुस्सत्ताए वा तिरिक्खजोणियत्ताए वा  
 गच्छिज्जा, एवं सव्वदेवा ।

पुढविकाइया दुगतिया दुयागतिया पन्नत्ता, तंजहा-पुढविकाइए पुढविकाइएसु  
 उववज्जमामे पुढविकाइएहिंतो वा णोपुढविकाइएहिंतो वा उववज्जेज्जा, से चेव  
 णं से पुढविकाइए पुढविकाइयत्तं विप्पजहमाणे पुढविकाइत्ताए वा णोपुढ-  
 विकाइयत्ताए वा गच्छेज्जा, एवं जाव मणुस्सा ।

६९. दुविहा णेरतिया पन्नत्ता, तंजहा-भवसिद्धिया चेव अभवसिद्धिया चेव, जाव  
 वेमाणिया १।

दुविहा नेरइया पन्नत्ता, तंजहा-अणंतरोववन्नगा चेव परंपरोववन्नगा चेव,  
 जाव वेमाणिया २।

दुविहा णेरतिया पन्नत्ता, तंजहा-गतिसमावन्नगा चेव अगतिसमावन्नगा  
 चेव, जाव वेमाणिया ३।

दुविधा नेरइया पन्नत्ता, तंजहा-पढमसमओववन्नगा चेव अपढमसम-  
 ओववन्नगा चेव, जाव वेमाणिया ४।

दुविधा नेरतिया पन्नत्ता, तंजहा-आहारगा चेव अणाहारगा चेव, एवं जाव  
 वेमाणिया ५।

दुविहा णेरतिया पन्नत्ता, तंजहा-उस्सासगा चेव णोउस्सासगा चेव, जाव  
 वेमाणिया ६।

दुविहा नेरइया पन्नत्ता, तंजहा-सइंदिया चेव अणिंदिया चेव, जाव वेमा-  
 णिया ७।

दुविहा नेरइया पन्नत्ता, तंजहा-पज्जत्तगा चेव अपज्जत्तगा चेव, जाव  
 वेमाणिया ८।

दुविहा नेरइया पन्नत्ता, तंजहा-सन्नि चेव असन्नि चेव, एवं पंचेंदिया सव्वे विगलिंदियवज्जा, जाव वाणमंतरा ९।

दुविधा नेरइया पन्नत्ता, तंजहा-भासगा चेव अभासगा चेव, एवमेगिंदियवज्जा सव्वे १०।

दुविहा नेरइया पन्नत्ता, तंजहा-सम्मदिट्ठीया चेव, मिच्छदिट्ठीया चेव, एगिंदियवज्जा सव्वे ११।

दुविहा नेरइया पन्नत्ता, तंजहा-परित्तसंसारिता चेव अणंतसंसारिता चेव, जाव वेमाणिया १२।

दुविहा नेरइया पन्नत्ता, तंजहा-संखेज्जकालसमयट्ठितीया चेव असंखेज्ज-कालसमयट्ठितीया चेव, एवं पंचेंदिया एगिंदियविगलिंदियवज्जा जाव वाणमंतरा १३।

दुविहा नेरइया पन्नत्ता, तंजहा-सुलभबोधिया चेव दुल्लभबोधिया चेव, जाव वेमाणिया १४।

दुविहा नेरइया पन्नत्ता, तंजहा-कण्हपक्खिया चेव सुक्कपक्खिया चेव, जाव वेमाणिया १५।

दुविहा नेरइया पन्नत्ता, तंजहा-चरिमा चेव अचरिमा चेव, जाव वेमाणिया १६।

७०. दोहिं ठाणेहिं आता अथेलोगं जाणति पासति, तंजहा-समोहतेणं चेव अप्पाणेणं आता अहेलोगं जाणति पासति, असमोहतेणं चेव अप्पाणेणं आता अहेलोगं जाणति पासति, आथोहिं समोहतासमोहतेणं चेव अप्पाणेणं आता अहेलोगं जाणति पासति । एवं तिरियलोगं २ उट्ठलोगं ३ केवलकप्पं लोगं ४।

दोहिं ठाणेहिं आता अथेलोगं जाणति पासति, तंजहा-विउव्वितेणं चेव अप्पाणेणं आता अथेलोगं जाणति पासति, अविउव्वितेणं चेव अप्पाणेणं आता अथेलोगं जाणति पासति, आहोधि विउव्वियाविउव्वितेणं चेव अप्पाणेणं आता अथेलोगं जाणति पासति १। एवं तिरियलोगं २ उट्ठलोगं ३ केवलकप्पं लोगं ४।

७१. दोहिं ठाणेहिं आया सदाइं सुणेति, तंजहा-देसेण वि आया सदाइं सुणेति, सव्वेण वि आया सदाइं सुणेति, एवं रूवाइं पासति, गंधाइं अग्घाति रसाइं आसादेति, फासाइं पडिसंवेदेति ५।

दोहिं ठाणेहिं आया ओभासइ, तंजहा-देसेण वि आया ओभासति सव्वेण वि आया ओभासति । एवं पभासति, विकुब्बति, परियारेति, भासं भासति, आहारेति, परिणामेति, वेदेति, निज्जेति ९।

दोहिं ठाणेहिं देवे सदाइं सुणेति, तंजहा-देसेण वि देवे सदाइं सुणेति, सव्वेण वि देवे सदाइं सुणेइ, जाव निज्जेति १४।

७२. मरुया देवा दुविहा पन्नत्ता, तंजहा-एगसरीरि चेव विसरीरि चेव । एवं किन्नरा, किंपुरिसा, गंधव्वा, णागकुमारा, सुवन्नकुमारा, अग्निकुमारा, वायुकुमारा ८।

देवा दुविहा पन्नत्ता, तंजहा-एगसरीरि चेव विसरीरि चेव ।

॥बिट्ठाणस्स बीओ उदेसओ समत्तो ॥

(तइओ उदेसओ)

७३. दुविहे सदे पन्नत्ते, तंजहा-भासासदे चेव णोभासासदे चेव १। भासासदे दुविहे पन्नत्ते, तंजहा-अक्खरसंबद्धे चेव नोक्खरसंबद्धे चेव २। णोभासासदे दुविहे पन्नत्ते, तंजहा-आउज्जसदे चेव णोआउज्जसदे चेव ३। आउज्जसदे दुविहे पन्नत्ते, तंजहा-तते चेव वितते चेव ४। तते दुविहे पन्नत्ते, तंजहा-घणे चेव झुसिरे चेव ५। एवं वितते वि ६। णोआउज्जसदे दुविहे पन्नत्ते, तंजहा-भूसणसदे चेव नोभूसणसदे चेव ७। णोभूसणसदे दुविहे पन्नत्ते, तंजहा-तालसदे चेव लत्तियासदे चेव ८।

दोहिं ठाणेहिं सदुप्पाते सिया, तंजहा-साहन्नंताण चेव पुगलाणं सदुप्पाए सिया, भिज्जंताण चेव पोग्गलाणं सदुप्पाते सिया ।

७४. दोहिं ठाणेहिं पोग्गला साहन्नंति, तंजहा-सइं वा पोग्गला साहन्नंति, परेण वा पोग्गला साहन्नंति १। दोहिं ठाणेहिं पोग्गला भिज्जंति, तंजहा-सइं वा

पोग्गला भिज्जंति, परेण वा पोग्गला भिज्जंति २।

दोहिं ठाणेहिं पोग्गला परिपडंति, तंजहा-सइं वा पोग्गला परिपडंति, परेण वा पोग्गला परिप(पा?)डिज्जंति ३, एवं परिसडंति४, विद्धंसंति ५।

७५. दुविहा पोग्गला पन्नत्ता, तंजहा-भिन्ना चेव अभिन्ना चेव १। दुविहा पोग्गला पन्नत्ता, तं जहा--भेउरधम्मा चेव नोभेउरधम्मा चेव २।

दुविहा पोग्गला पन्नत्ता, तंजहा-परमाणुपोग्गला चेव, नोपरमाणुपोग्गला चेव ३।

दुविहा पोग्गला पन्नत्ता, तंजहा-सुहुमा चेव बायरा चेव ४।

दुविहा पोग्गला पन्नत्ता, तंजहा-बद्धपासपुट्टा चेव नोबद्धपासपुट्टा चेव ५।

दुविहा पोग्गला पन्नत्ता, तंजहा-परियाइयच्चेव अपरियाइयच्चेव ६।

दुविहा पोग्गला पन्नत्ता, तंजहा-अत्ता चेव अणत्ता चेव ७।

दुविहा पोग्गला पन्नत्ता, तंजहा-इट्ठा चेव अणिट्ठा चेव ८, एवं कंता ९, पिया १०, मणुत्ता ११, मणामा १२।

दुविहा सहा पन्नत्ता, तंजहा-अत्ता चेव अणत्ता चेव १, एवमिट्ठा जाव मणामा ६। दुविहा रूवा पन्नत्ता, तंजहा-अत्ता चेव अणत्ता चेव, जाव मणामा ६। एवं गंधा ६, रसा ६, फासा ६, भूवमेक्के छ आलावगा भामियव्वा ।

७६. दुविहे आयारे पन्नत्ते, तंजहा-णाणायारे चेव नोनाणायारे चेव १। णोनाणायारे दुविहे पन्नत्ते, तंजहा-दंसणायारे चेव नोदंसणायारे चेव २। नोदंसणायारे दुविहे पन्नत्ते, तंजहा-चरित्तायारे चेव नोचरित्तायारे चेव ३। णोचरित्तायारे दुविहे पन्नत्ते, तंजहा-तवायारे चेव वीरियायारे चेव ४।

७७. दो पडिमाओ पन्नत्ताओ, तंजहा-समाहिपडिमा चेव उवहाणपडिमा चेव १।

दो पडिमाओ पन्नत्ताओ, तंजहा-विवेगपडिमा चेव विउसग्गपडिमा चेव २।

दो पडिमाओ पन्नत्ताओ, तंजहा-भद्दा चेव सुभद्दा चेव ३।

दो पडिमाओ पन्नत्ताओ, तंजहा-महाभद्दा चेव सव्वतोभद्दा चेव ४।

दो पडिमाओ पन्नत्ताओ, तंजहा-खुड्डिया चेव मोयपडिमा, महल्लिया चेव मोयपडिमा ५।

दो पडिमाओ पन्नत्ताओ, तंजहा-जवमज्झा चेव चंदपडिमा, वडरमज्झा



चेव चंदपडिमा ६।

७८. दुविधे सामाइए पन्नत्ते, तंजहा-अगारसामाइ चेव अणगारसामाइए चेव ।

७९. दोण्हं उववाते पन्नत्ते, तंजहा-देवाण चेव नेरइयाण चेव १।

दोण्हं उव्वट्टणा पन्नत्ता, तंजहा-णेरइयाण चेव भवणवासीण चेव २।

दोण्हं चयणे पन्नत्ते, तंजहा-जोइसियाण चेव वेमाणियाण चेव ३।

दोण्हं गब्भवक्कंती पन्नत्ता, तंजहा-मणुस्साण चेव पंचेंदियतिरिक्खजोणियाण चेव ४।

दोण्हं गब्भत्थाणं आहारे पन्नत्ते, तंजहा-मणुस्साण चेव पंचेंदियतिरिक्ख-जोणियाण चेव ५।

दोण्हं गब्भत्थाणं वुट्ठी पन्नत्ता, तंजहा-मणुस्साण चेव पंचेंदियतिरिक्खजोणियाण चेव ६। एवं निवुट्ठी ७, विगुव्वणा ८, गतिपरियाए ९, समुग्धाते १०, कालसंजोगे ११, आयाती १२, मरणे १३।

दोण्हं छविव्वं पन्नत्ता, तंजहा-मणुस्साण चेव पंचेंदियतिरिक्खजोणियाण चेव १४।

दो सुक्क-सोणितसंभवा पन्नत्ता, तंजहा-मणुस्सा चेव पंचेंदियतिरिक्खजोणिया चेव १५।

दुविहा ठिती पन्नत्ता, तंजहा-कायट्ठिती चेव भवट्ठिती चेव १६।

दोण्हं कायट्ठिती पन्नत्ता, तंजहा-मणुस्साण चेव पंचेंदियतिरिक्खजोणियाण चेव १७।

दोण्हं भवट्ठिती पन्नत्ता, तंजहा-देवाण चेव नेरइयाण चेव १८।

दुविहे आउए पन्नत्ते, तंजहा-अद्धाउए चेव भवाउए चेव १९।

दोण्हं अद्धाउए पन्नत्ते, तंजहा-मणुस्साण चेव पंचेंदियतिरिक्खजोणियाण चेव २०।

दोण्हं भवाउए पन्नत्ते, तंजहा-देवाण चेव नेरइयाण चेव २१।

दुविहे कम्मे पन्नत्ते, तंजहा-पदेसकम्मे चेव अणुभावकम्मे चेव २२। दो अहाउयं पालेंति, तंजहा-देवच्चेव नेरइयच्चेव २३।

दोण्हं आउयसंवट्टए पन्नत्ते, तंजहा-मणुस्साण चेव पंचेंदियतिरिक्ख-  
जोणियाण चेव २४।

८०. जंबुदीवे दीवे मंदरस्स पव्वयस्स उत्तरदाहिणेणं दो वासा पन्नत्ता बहुसमतुल्ला  
अविसेसमणाणत्ता अन्नमन्नं णातिवट्ठंति आयाम-विक्खंभ-संठाण-  
परिणाहेणं, तंजहा-भरहे चेव एरवते चेंव । एवमेतेणमभिलावेणं हेमवते  
चेव हेरन्नवते चेव, हरिवासे चेव रम्मयवासे चेव ।

८१. जंबुदीवे दीवे मंदरस्स पव्वयस्स पुरत्थिमपच्चत्थिमेणं दो खेत्ता पन्नत्ता  
बहुसमतुल्ला अविसेस जाव पुव्वविदेहे चेव अवरविदेहे चेव ।

८२. जंबूमंदरस्स पव्वतस्स उत्तरदाहिणेणं दो कुराओ पन्नत्ताओ बहुसमतुल्लाओ  
जाव देवकुरा चेव उत्तरकुरा चेव । तत्थ णं दो महतिमहालया महादुमा  
पन्नत्ता बहुसमतुल्ला अविसेसमणाणत्ता अन्नमन्नं णाड्वट्ठंति आयाम-  
विक्खंभुच्चत्तोव्वेध-संठाण-परिणाहेणं, तंजहा-कूडसामली चेव, जंबू चेव  
सुदंसणा । तत्थ णं दो देवा महिड्डिया जाव महासोक्ख्वा पलिओवमट्ठितीया  
परिवसंति, तंजहा-गरुले चेव वेणुदेवे, अणाढिते चेव जंबूदीवाहिवती ।

८३. जंबूमंदरस्स पव्वयस्स उत्तरदाहिणेणं दो वासहरपव्वया पन्नत्ता बहुसमतुल्ला  
अविसेसमणाणत्ता अन्नमन्नं णातिवट्ठंति आयामविक्खंभुच्चत्तोव्वेध संठाण-  
परिणाहेणं, तंजहा-चुल्लहिमवंते चेव सिहरी चेव, एवं महाहिमवंते चेव रुप्पी  
चेव, एवं णिसढे चेव णीलवंते चेव ।

८४. जंबूमंदरस्स पव्वयस्स उत्तरदाहिणेण हेमवतेरणवतेसु वासेसु दो  
वट्ठवेयड्डपव्वता पन्नत्ता बहुसमतुल्ला अविसेसमणाणत्ता जाव सदावती चेव  
वियडावती चेव, तत्थ णं दो देवा महिड्डिया जाव पलिओवमट्ठितीया  
परिवसंति, तंजहा-साती चेव पभासे चेव ।

जंबूमंदरस्स उत्तरदाहिणेणं हरिवरिस-रम्मतेसु वासेसु दो वट्ठवेयड्डपव्वया  
पन्नत्ता बहुसमतुल्ला अविसेसमणाणत्ता जाव गंधावती चेव मालवंतपरियाए चेव,  
तत्थ णं दो देवा महिड्डिया जाव पलिओवमट्ठितीया परिवसंति, तंजहा-अरुणे  
चेव पउमे चेव ।

८५. जंबूमंदरस्स पव्वयस्स दाहिणेणं देवकुराए कुराए पुव्वावरे पासे एत्थ णं

आसक्खंधगसरिसा अद्धचंदसंठाणसंठिया दो वक्खारपव्वता पन्नत्ता बहुसम जाव सोमसणे चेव विज्जुप्पभे चेव ।

जंबूमंदरउत्तरेणं उत्तरकुराए कुराए पुव्वावरे पासे एत्थ णं आसक्खंधगसरिसा अद्धचंदसंठाणसंठिया दो वक्खारपव्वया पन्नत्ता बहुसम जाव गंधमादणे चेव मालवंते चेव ।

८६. जंबूमंदरस्स पव्वयस्स उत्तरदाहिणेणं दो दीहवेयड्डपव्वया पन्नत्ता बहुसमतुल्ला जाव भारहए चेव दीहवेयड्डे, एरावयते चेव दीहवेयड्डे । भारहए णं दीहवेयड्डे दो गुहाओ पन्नत्ताओ बहुसमतुल्लाओ अविसेसमणाणत्ताओ अन्नमन्नं णातिवट्ठंति आयामविक्खंभुच्चत्तसंठाणपरिणाहेणं, तंजहा-तिमिसगुहा चेव खंडगप्पवायगुहा चेव, तत्थ णं दो देवा महिड्डिया जाव पलिओवमाड्ढीया परिवसंति, तंजहा-कयमालए चेव नट्टमालए चेव । एरावयए णं दीहवेयडे दो गुहाओ पन्नत्ताओ जाव कयमालए चेव नट्टमालए चेव ।

८७. जंबूमंदरस्स पव्वयस्सं दाहिणेणं चुल्लहिमवंते वासहरपव्वए दो कूडा पन्नत्ता बहुसमतुल्ला जाव विक्खंभुच्चत्तसंठाणपरिणाहेणं, तंजहा-चुल्लहिमवंतकूडे चेव वेसमणकूडे चेव । जंबूमंदरदाहिणेणं महाहिमवंते वासहरपव्वते दो कूडा पन्नत्ता बहुसम जाव महाहिमवंतकूडे चेव वेरुलियकूडे चेव । एवं निसडे वासहरपव्वते दो कूडा पन्नत्ता बहुसम जाव निसडकूडे चेव रुयगकूडे चेव ।

जंबूमंदरउत्तरेणं नीलवंते वासहरपव्वते दो कूडा पन्नत्ता बहुसम जाव तंजहा-नीलवंतकूडे चेव उवदंसणकूडे चेव । एवं रुपिम्मि वासहरपव्वते दो कूडा पन्नत्ता बहुसम जाव तंजहा-रुपिकूडे चेव मणिकंचणकूडे चेवप । एवं सिहरिम्मि वासहरपव्वते दो कूडा पन्नत्ता बहुसम जाव तंजहा-सिहरिकूडे चेव तिगिंछिक्खकूडे चेव ।

८८. जंबूमंदरउत्तरदाहिणेणं चुल्लहिमवंत-सिहरीसु वासहरपव्वतेसु दो महदहा पन्नत्ता बहुसमतुल्ला अविसेसमणाणत्ता अण्णमण्णं णातिवट्ठंति, आयामविक्खंभउव्वेहसंठाणपरिणाहेणं, तंजहा-पउमदहे चेव पुंडरीयदहे चेव, तत्थ णं दो देवयाओ महिड्डियाओ जाव पलिओवमड्ढीयाओ परिवसंति,

तंजहा-सिरी चेव लच्छी चेव । एवं महाहिमवंत-रुप्पीसु वासहरपव्वएसु दो महदहा पन्नत्ता बहुसम जाव तंजहा-महापउमदहे चेव महापुंडरीयदहे चेव, देवताओ हिरिच्चेव बुद्धिच्चेव । एवं निसढनीलवंतेसु तिगिंछिदहे चेव केसरिदहे चेव, देवताओ धिती चेव किती चेव ।

८९. जंबूमंदरदाहिणेणं महाहिमवंताओ वासहरपव्वयाओ महापउमदहाओ दहाओ दो महाणदीओ पवहंति, तंजहा-रोहियच्चेव हरिकंतच्चेव । एवं निसढाओ वासहरपव्वताओ तिगिंछिदहाओ दहाओ दो महाणईओ पवहंति, तंजहा-हरिच्चेव सीतोतच्चेव ।

जंबूमंदरउत्तरेण नीलवंताओ वासधरपव्वताओ केसरिदहाओ दहाओ दो महानईओ पवहंति, तंजहा-सीता चेव नारिकंता चेव । एवं रुप्पीओ वासहरपव्वताओ महापुंडरीयदहाओ दहाओ दो महानईओ पवहंति, तंजहा-णरकंता चेव रुप्पकूला चेव ।

९०. जंबूमंदरदाहिणेणं भरहे वासे दो पवायदहा पन्नत्ता बहुसम (जाव) तंजहा-गंगप्पवातदहे चेव सिंधुप्पवायदहे चेव । एवं हेमवए वासे दो पवायदहा पन्नत्ता बहु(सम जाव) तंजहा-रोहियप्पवातदहे चेव रोहियसप्पवातदहे चेव ।

जंबूमंदरदाहिणेणं हरिवासे वासे दे पवायदहा पन्नत्ता बहुसम (जाव) तंजहा-हरिपवातदहे चेव हरिकंतपवातदहे चेव ।

जंबूमंदरउत्तरदाहिणेणं महाविदेहे वासे दो पवायदहा पन्नत्ता बहुसम जाव सीयप्पवातदहे चेव सीतोदप्पवायदहे चेव ।

जंबूमंदरउत्तरेणं रम्मए वासे दो पवायदहा पन्नत्ता बहु(सम जाव) नरकंतप्पवायदहे णारीकंतप्पवायदहे चेव । एवं हेरन्नवते वासे दो पवायदहा पन्नत्ता बहु(सम जाव) सुवन्नकूलप्पवायदहे चेव रुप्पकूलप्पवायदहे चेव ।

जंबूमंदरउत्तरेणं एरवए वासे दो पवायदहा पन्नत्ता बहु(सम) जाव रुत्तप्पवायदहे चेव रत्तावडप्पवातदहे चेव ।

९१. जंबूमंदरदाहिणेणं भरहे वासे दो महानईओ पन्नत्ताओ बहु(सम) जाव गंगा चेव सिंधू चेव । एवं जथा पवातदहा एवं णईओ भाणियव्वाओ, जाव एरवए वासे दो महानईओ पन्नत्ताओ बहुसमतुल्लाओ जाव रत्ता चेव रत्तवती

चेव ।

१२. जंबूदीवे दीवे भरहेरवतेसु वासेसु तीताए उस्सप्पिणीए सुसमदूसमाए समाए दो सागरोवमकोडाकोडीओ काले होत्था १, एवमिमीसे ओसप्पिणीए जाव पन्नत्ते २, एवं आगमेसाए उस्सप्पिणीए जाव भविस्सति ३।

जंबूदीवे दीवे भरहेरवतेसु वासेसु तीताए उस्सप्पिणीए सुसभाए समाए मणुया दो गाउयाइं उड्डंउच्चत्तेणं होत्था, दोन्नि य पलिओवमाइं परमाउं पालयित्था ४, एवमिमीसे ओसप्पिणीए जाव पालयित्था ५, एवमागमेसाते उस्सप्पिणीए जाव पालयिस्संति ६।

१३. जंबूदीवे दीवे भरहेरवएसु वासेसु एगसमये एगजुगे दो अरहंतवंसा उप्पजिसु वा उप्पज्जंति वा उप्पजिस्संति वा ७, एवं चक्कवट्ठिवंसा ८, दसारवंसा ९।

जंबू(दीवे दीवे) भरहेरवतेसु (वासेसु) एगसमते दो अरहंता उप्पजिंसु वा उप्पज्जंति वा उप्पजिस्संति वा १०, एवं चक्कवट्ठि ११, एवं बलदेवा १२, एवं वासुदेवा जाव उप्पजिस्संति वा १३।

१४. जंबूदीवे दीवे दोसु कुरासु मणुया सता सुसमसुसममुत्तमं इड्ढिं पत्ता पच्चणुभवमाणा विहरंति, तंजहा-देवकुराए चेव उत्तरकुराए चेव १४। जंबूदीवे दीवे दोसु वासेसु मणुया सता सुसममुत्तमं इड्ढिं पत्ता पच्चणुभवमाणा विहरंति, तंजहा-हरिवासे चेव रम्मगवासे चेव १५। जंबूदीवे दीवे दोसु वासेसु मणुया सता सुसमदूसममुत्तममिड्ढिं पत्ता पच्चणुभवमाणा विहरंति, तंजहा-हेमवते चेव हेरन्नवते चेव १६। जंबूदीवे दीवे दोसु खेत्तेसु मणुया सता दूसमसुसममुत्तममिड्ढिं पत्ता पच्चणुभवमाणा विहरंति, तंजहा-पुव्वविदेहे चेव अवरविदेहे चेव १७। जंबूदीवे दीवे दोसु वासेसु मणुया छव्विहं पि कालं पच्चणुभवमाणा विहरंति, तंजहा-भरहे चेव एवते चेव १८।

१५. जंबूदीवे दीवे दो चंदा पभासिंसु वा पभासंति वा पभासिस्संति वा, दो सूरिआ तवइंसु वा तवंति वा तवइस्संति वा, दो कत्तियाओ, दो रोहिणीओ, दो मगसिरा, दो अद्दाओ, एवं भाणियव्वं,

कत्तिय, रोहिणि, मगसिर, अद्दा य, पुणव्वसू य, पूसो य ६।  
 तत्तो वि अस्सलेसा, महा य, दो फग्गुणीओ य ९-१० ॥१॥  
 हत्थो, चित्ता, साती य, विसाहा, तह य होति अणुराहा १५।  
 जेड्ढा, मूलो, पुव्वा य आसाहा, उत्तरा चेव १९ ॥२॥  
 अभिई, सवण, धणिङ्गा, मयभिसया, दो य होंति भद्दवया २४-२५।  
 रेवति, अस्सिणी, भरणी, १६ नेतव्वा आणुपुव्वीए ॥३॥  
 एवं गाहाणुसारेणं णेयव्वं जाय दो भरणीओ ।

दो अग्गी १, दो पयावती २, दो सोमा ३, दो रुद्दा ४, दो अदिती ५,  
 दो बहस्सती ६, दो सप्पी ७, दो पीती ८, दो भगा ९, दो अज्जमा १०,  
 दो सविता ११, दो तट्ठा १२, दो वाऊ १३, दो इंदग्गी १४, दो मित्ता १५,  
 दो इंदा १६, दो निरीती १७, दो आऊ १८, दो विस्सा १९, दो बम्हा २०,  
 दो विण्हू २१, दो वसू २२, दो वरुणा २३, दो अया २४, दो विविद्धी २५,  
 दो पुस्सा २६, दो अस्सा २७, दो यमा २८।

दो इंगालगा १, दो वियालगा २, दो लोहितक्खा ३, दो सण्णिचरा ४,  
 दो आहुणिया ५, दो पाहुणिया ६, दो कणा ७, दो कणगा ८, दो कणकणगा ९,  
 दो कणगविताणगा १०, दो कणगसंताणगा ११, दो सोमा १२, दो सहिया १३,  
 दो आसासणा १४, दो कज्जोवगा १५, दो कब्बडगा १६, दो अयकरगा १७,  
 दो दुंदुभगा १८, दो संखा १९, दो संखवन्ना २०, दो संखवन्नाभा २१,  
 दो कंसा २२, दो कंसवन्ना २३, दो कंसवन्नाभा २४, दो रुप्पी २५, दो रुप्पाभासा २६,  
 दो णीला २७, दो णीलोभासा २८, दो भासा २९, दो भासरासी ३०,  
 दो तिला ३१, दो तिलपुप्फवण्णा ३२, दो दगा ३३, दो दगपंचवन्ना ३४, दो  
 काका ३५, दो कक्कंधा ३६, दो इंदग्गी ३७, दो धूमकेऊ ३८, दो हरी ३९,  
 दो पिंगला ४०, दो बुधा ४१, दो सुक्का ४२, दो बहस्सती ४३, दो राहू ४४,  
 दो अगत्थी ४५, दो माणवगा ४६, दो कासा ४७, दो फासा ४८, दो धुरा ४९,  
 दो पमुहा ५०, दो वियडा ५१, दो विसंधी ५२, दो नियल्ला ५३, दो  
 पडल्ला ५४, दो जडियाइल्ला ५५, दो अरुणा ५६, दो अगिल्ला ५७, दो काला ५८,  
 दो महाकालगा ५९, दो सोत्थिया ६०, दो सोवत्थिया ६१, दो वद्धमाणगा

६२, दो पूसमाणगा, दो अंकुसा, दो पलंबा ६३, दो निच्चालोगा ६४, दो णिच्चुज्जोता ६५, दो सयंपभा ६६, दो ओभासा ६७, दो सेयंकरा ६८, दो खेमंकरा ६९, दो आभंकरा ७०, दो पभंकरा ७१, दो अपराजिता ७२, दो अरया ७३, दो असोगा ७४, दो विगतसोगा ७५, दो विमला ७६, दो विमुहा, दो वितत्ता ७७, दो वितत्था ७८, दो विसाला ७९, दो साला ८०, दो सुव्वता ८१, दो अणियट्ठी ८२, दो एणजडी ८३, दो दुजडी ८४, दो करकरिगा ८५, दो रायगगला ८६, दो पुप्फकेतू ८७, दो भावकेऊ ८८ ।

९६. जंबूदीवस्स णं दीवस्स वेइया दो गाउयाइं उह्णुच्चत्तेणं पण्णत्ता ।

९७. लवणे णं समुदे दो जोयणसयसहस्साइं चक्कवालविक्खंभेणं पण्णत्ते ।

९८. लवणस्स णं समुदस्स वेतिया दो गाउयाइं उह्णुच्चत्तेणं पन्नत्ता ।

९९. धायइसंडे दीवे पुरत्थिमद्धे णं मंदरस्स पव्वयस्स उत्तरदाहिणेणं दो वासा पन्नत्ता बहुसमतुला जाव भरहे चेव एवए चेव, एवं जहा जंबुदीवे तहा एत्थ वि भाणियव्वं जाव दोसु वासेसु मणुया छव्विहं पि कालं पच्चणुभवमाणा विहरंति, तंजहा-भरहे चेव एवते चेव, णवरं कूडसामली चेव धायइरुक्खे चेव, देवा गरुले चेव वेणुदेवे, सुंदसणे चेव ।

धाततीसंडदीवपच्चत्थिमद्धे मंदरस्स पव्वयस्स उत्तरदाहिणेणं दो वासा पन्नत्ता बहु(समतुल्ला) जाव भरहे चेव एवए चेव जाव छव्विहं पि कालं पच्चणुभवमाणा विहरंति, (तंजहा-) भरहे चेव एवए चेव, णवरं कूडसामली चेव महाधायईरुक्खे चेव, देवा गरुले चेव वेणुदेवे, पियदंसणे चेव ।

१००. धायइसंडे णं दीवे दो भरहाइं, दो एवताइं, दो हेमवताइं, दो हेरन्नवताइं, दो हरिवासाइं, दो रम्मगवासाइं, दो पुव्वविदेहाइं, दो अवरविदेहाइं, दो देवकुराओ, दो देवकुरमहहुमा, दो देवकुरमहहुमवासी देवा, दो उत्तरकुराओ, दो उत्तरकुरमहहुमा, दो उत्तरकुरमहहुमवासी देवा,

दो चुल्लहिमवंता, दो महाहिमवंता, दो निसहा, दो नीलवंता, दो रुप्पी, दो सिहरी,

दो सद्दावती, दो सद्दावतिवासी साती देवा, दो वियडावती, दो वियडावतिवासी पभासा देवा, दो गंधावती, दो गंधावतिवासी अरुणा देवा,

दो मालवंतपरियागा, दो मालवंतपरियागवासी पउमा देवा,

दो मालवंता, दो चित्तकूडा, दो पम्हकूडा, दो नलिणकूडा, दो एगसेला, दो तिकूडा, दो वेसमणकूडा, दो अंजणा, दो मातंजणा, दो सोमसणा, दो विज्जुप्पभा, दो अंकावती, दो पम्हावती, दो आसीविसा, दो सुहावहा, दो चंदपव्वता, दो सूरपव्वता, दो णागपव्वता, दो देवपव्वया, दो गंधमायणा, दो उसुगारपव्वता, दो चुल्लहिमवतंकूडा, दो वेसमणकूडा, दो महाहिमवतंकूडा, दो वेरुलियकूडा दो निसहकूडा, दो रुयगकूडा, दो नीलवंतकूडा, दो उवदंसणकूडा, दो रुप्पिकूडा, दो मणिकंचणकूडा, दो सिहरिकूडा, दो तिगिंछिकूडा,

दो पउमदहा, दो पउमदहवासिणीओ सिरीदेवीओ, दो महापउमदहा दो महापउमदहवासिणीओ हिरीओ देवीओ, एवं जाव दो पुंडरीयदहा, दो पुंडरीयदहवासिणीओ लच्छीओ देवीओ,

दो गंगप्पवायदहा जाव दो रत्तावतिप्पवातदहा, दो रोहियाओ जाव दो रुप्पकूलातो,

दो गाहावतीओ, दो दहवतीओ, दो पंकवतीओ, दो तत्तजलाओ, दो मत्तजलाओ, दो उम्मत्तजलाओ, दो खारोयाओ, दो सीहसोताओ, दो अंतोवाहिणीओ, दो उम्मिमालिणीओ, दो फेणमालिणीओ, दो गंभीरमालिणीओ,

दो कच्छा, दो सुकच्छा, दो महाकच्छा, दो कच्छावती, दो आवत्ता, दो णगंलावत्ता, दो पुक्खला, दो पुक्खलावती, दो वच्छा, दो सुवच्छा, दो महावच्छा, दो वच्छगावती, दो रम्मा, दो रम्मगा, दो रमणिज्जा, दो मंगलावती, दो पम्हा, दो सुपम्हा, दो महापम्हा, दो पम्हागावती, दो संखा, दो णलिणा, दो कुमुया, दो सलिलावती, दो वप्पा, दो सुवप्पा, दो महावप्पा, दो वप्पगावती, दो वग्गू, दो सुवग्गू, दो गंधिला, दो गंधिलावती ३२,

दो खेमाओ, दो खेमपुराओ, दो रिद्धाओ, दो रिद्धपुराओ, दो खग्गीतो, दो मंजूसाओ, दो ओसधीओ, दो पुंडरिणिणाओ, दो सुसीमाओ, दो कुंडलाओ, दो अपराजियाओ, दो पभंकराओ, दो अंकावईओ, दो पम्हावईओ, दो सुभाओ, दो रयणसंचयाओ, दो आसपुराओ, दो सीहपुराओ, दो महापुराओ, दो विजयपुराओ, दो अवरजिताओ, दो अरयाओ, दो असोगाओ, दो विगयसोगाओ,



दो विजयाओ, दो वेजयंतीओ, दो जयंतीओ, दो अपराजियाओ, दो चक्रपुराओ,  
दो खग्गपुराओ, दो अवज्झाओ, दो अउज्झाओ ३२,

दो भद्दसालवणा, दो णंदणवणा, दो सोमणसवणा, दो पंडगवणाइं,  
दो पंडुकंबलसिलाओ, दो अतिपंडुकंबलसिलाओ, दो रत्तकंबलसिलाओ,  
दो अतिरत्तकंबलसिलाओ,

दो मंदरा, दो मंदरचूलिताओ ।

१०१. धायइसंडस्स णं दीवस्स वेदिया दो गाउयाइं उड्ढमुच्चत्तेणं पण्णत्ता ।

१०२. कालोदस्स णं समुदस्स वेइया दो गाउयाइं उड्ढमुच्चत्तेणं पण्णत्ता ।

१०३. पुक्खरवरदीवड्ढपुरत्थिमद्धे णं मंदरस्स पव्वयस्स उत्तरदाहिणेणं दो वासा  
पन्नत्ता बहुसमतुल्ला जाव भरहे चेव एवए चेव, तहेव जाव दो कुराओ  
पन्नत्ताओ० देवकुरा चेव उत्तरकुरा चेव । तत्थ णं दो महतिमहालया महदुमा  
पन्नत्ता, तंजहा-कूडसामली चेव पउमरुक्खे चेव, देवा गरुले चेव वेणुदेवे,  
पउमे चेव, जाव छव्विहं पि कालं पच्चणुभवमाणा विहरंति ।

पुक्खरवरदीवड्ढपच्चत्थिमद्धे णं मंदरस्स पव्वयस्स उत्तरदाहिणेणं दो वासा  
पन्नत्ता तहेव, णाणत्तं कूडसामली चेव, महापउमरुक्खे चेव, देवा गरुले चेव  
वेणुदेवे, पुंडरीए चेव ।

पुक्खरवरदीवड्ढे णं दीवे दो भरहाइं, दो एवताइं, जाव दो मंदरा, दो  
मंदरचूलियाओ ।

१०४. पुक्खरवरस्स णं दीवस्स वेइया दो गाउयाइं उड्ढमुच्चत्तेणं पन्नत्ता । सव्वेसिं  
पि णं दीवसमुद्दाणं वेदियाओ दो गाउयाइं उड्ढमुच्चत्तेणं पन्नत्ताओ ।

१०५. दो असुरकुमारिंदा पण्णत्ता, तंजहा-चमरे चेव बली चेव । दो णागकुमारिंदा  
पण्णत्ता, तंजहा-धरणे चेव भूयाणंदे चेव २। दो सुवन्नकुमारिंदा पन्नत्ता,  
तंजहा-वेणुदेवे चेव वेणुदाली चेव ३। दो विज्जुकुमारिंदा पण्णत्ता, तंजहा-  
हरिच्चेव हरिस्सहे चेव ४। दो अग्निकुमारिंदा पन्नत्ता, तंजहा-अग्निसिहे  
चेव अग्निमाणवे चेव ५। दो दीवकुमारिंदा पण्णत्ता, तंजहा-पुत्रे चेव वसिडे  
चेव ६। दो उदहिकुमारिंदा पण्णत्ता, तंजहा-जलकंते चेव जलप्पभे चेव  
७। दो दिसाकुमारिंदा पन्नत्ता, तंजहा-अभियगती चेव अमितवाहणे चेव

८। दो वातकुमारिंदा पन्नत्ता, तंजहा-वेलंबे चेव पभंजणे चेव १। दो थणियकुमारिंदा पणत्ता, तंजहा-घोसे चेव महाघोसे चेव १०।

दो पिसाइंदा पन्नत्ता, तंजहा-काले चेव महाकाले चेव १। दो भूइंदा पन्नत्ता, तंजहा-सुरूवे चेव पडिरूवे चेव २। दो जक्खिंदा पन्नत्ता, तंजहा-पुन्नभदे चेव माणिभदे चेव ३। दो रक्खसिंदा पन्नत्ता, तंजहा-भीमे चेव महाभीमे चेव ४। दो किन्नरिंदा पन्नत्ता, तं जहा-किन्नरे चेव किंपुरिसे चेव ५। दो किंपुरिसिंदा पन्नत्ता, तंजहा-सप्पुरिसे चेव महापुरिसे चेव ६। दो महोरगिंदा पन्नत्ता, तं जहा-अतिकाए चेव महाकाए चेव ७। दो गंधव्विंदा पन्नत्ता, तंजहा-गीतरती चेव गीयजसे चेव ८।

दो अणपन्निंदा पन्नत्ता, तंजहा-संनिहिए चेव सामाणे चेव १। दो पणपन्निंदा पन्नत्ता, तंजहा-धाते चेव विधाते चेव २। दो इसिवाइंदा पन्नत्ता, तंजहा-इसिच्चेव इसिवाले चेव ३। दो भूतवाइंदा पन्नत्ता, तंजहा-इस्सरे चेव महिस्सरे चेव ४। दो कंदिंदा पन्नत्ता तंजहा-सुवच्छे चेव विसाले चेव ५। दो महाकंदिंदा पन्नत्ता, तंजहा-हस्से चेव हस्सरती चेव ६। दो कुभंडिंदा पन्नत्ता, तंजहा-सेए चेव महासेए चेव ७। दो पतंइंदा पन्नत्ता, तंजहा-पतए चेव पतयवई चेव ८।

जोतिसियाणं देवाणं दो इंदा पन्नत्ता, तंजहा-चंदे चेव सूरे चेव ।

सोहम्मीसाणेसु णं कप्पेसु दो इंदा पन्नत्ता, तंजहा-सक्के चेव ईसाणे चेव । एवं सणंकुमार-माहिंदेसु कप्पेसु दो इंदा पन्नत्ता, तंजहा-सणंकुमारे चेव माहिंदे चेव । बंभलोग-लतएसु णं कप्पेसु दो इंदा पन्नत्ता, तंजहा-बंभे चेव लंतए चेव । महासुक्क-सहस्सारेसु णं कप्पेसु दो इंदा पन्नत्ता, तंजहा-महासुक्के चेव सहस्सारे चेव । आणतपाणतारणच्चुतेसु णं कप्पेसु दो इंदा पन्नत्ता, तंजहा-पाणते चेव अच्चुते चेव ।

महासुक्क-सहस्सारेसु णं कप्पेसु विमाणा दुवण्णा पन्नत्ता, तंजहा-हालिहा चेव सुक्किसा चेव ।

गेविज्जगा णं देवा णं दो रयणीओ उट्ठमुच्चत्तेणं पन्नत्ता ।

॥ तइओ उट्ठेसओ समत्तो ॥

(चउत्थो उद्देसओ)

१०६. समया ति वा आवलिया ति वा जीवा ति या अजीवा ति या पवुच्चति  
 १, आणापाणू ति वा थोवा ति वा जिवा ति या अजीवा ति या पवुच्चति  
 २, खणा ति वा लवा ति वा जीवा ति या अजीवा ति या पवुच्चति  
 ३, एवं मुहुत्ता ति वा अहोरत्ता ति वा ४, पक्खा ति वा भासा ति वा  
 ५, उदू ति वा अयणा ति वा ६, संवच्छरा ति वा जुगा ति वा ७,  
 वाससता ति वा वाससहस्सा ति वा ८, वाससतसहस्सा ति वा वासकोडी  
 ति वा ९, पुव्वंगा ति वा पुव्वा ति वा १०, तुडियंगा ति वा तुडिया  
 ति वा ११, अटटंगा ति वा अटटा ति वा १२, अववंगा ति वा अववा  
 ति वा १३, हूहूयंगा ति वा हूहूया ति वा १४, उप्पलंगा ति वा उप्पला  
 ति वा १५, पउमंगा ति वा पउमा ति वा १६, णलिणंगा ति वा णलिणा  
 ति वा १७, अत्थणिकुरंगा ति वा अत्थणिउरा ति वा १८, अउअंगा ति  
 वा अउआ ति वा १९, णउअंगा ति वा णउआ ति वा २०, पउतंगा  
 ति वा पउता ति वा २१, चूलितंगा ति वा चूलिता ति वा २२,  
 सीसपहेलियंगा ति वा सीसपहेलिया ति वा २३, पलिओवमा ति वा  
 सागरोवमा ति वा २४, उस्सप्पिणी ति वा ओसप्पिणी ति वा जीवा ति  
 या अजीवा ति या पवुच्चति २५।

गामा ति वा णगरा ति वा १, निगमा ति वा रायहाणी ति वा २,  
 खेडा ति वा कब्बडा ति वा ३, मडंबा ति वा दोणमुहा ति वा ४, पट्टणा  
 ति वा आगरा ति वा ५, आसमा ति वा संबाहा ति वा ६, संनिवेसा इ वा  
 घोसा ति वा ७, आरामा ति वा उज्जाणा ति वा ८, वणा ति वा वणसंडा  
 ति वा ९, वावी ति वा पुक्खरणी ति वा १०, सरा ति वा सरपंतिता ति  
 वा ११, अगडा ति वा तलागा ति वा १२, दहा ति वा णदी ति वा १३,  
 पुढवी ति वा उदही ति वा १४, वातखंधा ति वा उवासंतरा ति वा १५, वलता  
 ति वा विग्गहा ति वा १६, दीवा ति वा समुद्दा ति वा १७, वेला ति वा  
 वेतिता ति वा १८, दारा ति वा तोरणा ति वा १९, णेरतिता ति वा णेरतितावासा

ति वा २०, जाव वेमाणिया ति वा वेमाणियावासा ति वा ४३, कप्पा ति वा कप्पविमाणावासा ति वा ४४, वासा ति वा वासधरपव्वता ति वा ४५, कूडा ति वा कूडागारा ति वा ४६, विजया ति वा रायहाणी ति वा ४७, जीवा ति या अजीवा ति या पवुच्चति ।

छाया ति वा आतवा ति वा १, दोसिणा ति वा अंधगारा ति वा २, ओमाणा ति वा उम्माणा ति वा ३, अतिताणगिहा ति वा उज्जाणगिहा ति वा ४, अवलिंबा ति वा सणिप्पवाता ति वा ५, जीवा ति या अजीवा ति या पवुच्चइ ।

दो रासी पन्नत्ता, तंजहा-जीवरासी चेव अजीवरासी चेव ।

१०७. दुविहे बंधे पन्नत्ते, तंजहा-पेज्जबंधे चेव दोसबंधे चेव । जीवा णं दोहिं ठाणेहिं पावं कम्मं बंधंति, तंजहा-रागेण चेव दोसेण चेव । जीवा णं दोहिं ठाणेहिं पावं कम्मं उदीरंति, तंजहा-अब्भोवगमिताते चेव वेतणाते, उवक्कमिताते चेव वेयणाते । एवं वेदंति, एवं णिज्जरंति अब्भोवगमिताते चेव वेयणाते, उवक्कमिताते चेव वेयणाते ।

१०८. दोहिं ठाणेहिं आता सरीरं फुसित्ताणं णिज्जाति, तंजहा-देसेण वि आता सरीरं फुसित्ताणं णिज्जाति, सव्वेण वि आया सरीरं फुसित्ताणं णिज्जाति, एवं फुरित्ताणं, एवं फुडित्ताणं, एवं संवट्टित्ताणं, एवं निव्वट्टित्ताणं ।

१०९. दोहिं ठाणेहिं आता केवलिपन्नत्तं धम्मं लभेज्जा सवणताते, तंजहा-खतेण चेव उवसमेण चेव, एवं जाव मणपज्जवनानं उप्पाडेज्जा, तंजहा-खतेण चेव उवसमेण चेव ।

११०. दुविहे अब्धोवमि पन्नत्ते, तंजहा-पलिओवमे चेव सागरोवमे चेव । से किं तं पलिओवमे ? पलिओवमे-

जं जोयणवित्थिन्नं, पल्लं एगाहियप्परूढाणं ।

होज्ज निरंतरिणिचित्तं, भरितं बालगकोडीणं ॥४॥

वाससते वाससते, एक्केक्के अवहडंमि जो कालो ।

सो कालो बोद्धव्वो, उवमा एगस्स पल्लस्स ॥५॥

एतेसिं पल्लाणं, कोडाकोडी हवेज्ज दसगुणिता ।

तं सागरोवमस्स उ, एगस्स भवे परीमाणं ॥६॥

१११. दुविहे कोहे पन्नत्ते, तंजहा-आयपतिट्ठिते चेव परपइट्ठिए चेव, एवं नेरइयाणं जाव वेमाणियाणं । एवं जाव मिच्छादंसणसल्ले ।

११२. दुविहा संसारसमावन्नगा जीवा पन्नत्ता, तंजहा-तसा चेव थावरा चेव ।

दुविधा सब्बजीवा पन्नत्ता, तंजहा-सिद्धा चेव असिद्धा चेव । दुविहा सब्बजीवा पण्णत्ता, तंजहा-सइंदिया चेव अणिंदिया चेव । एवं एसा गाहा फासेतव्वा जाव ससरीरी चेव असरीरी चेव --

सिद्ध-सइंदिय-काए, जोगे वेदे कसाय लेसा य ।

णाणुवओगाहारे, भासग-चरिमे य ससरीरी ॥७॥

११३. दो मरणाइं समणेणं भगवता महावीरेणं समणाणं णिगंथाणं णो णिच्चं वन्नियाइं णो णिच्चं कित्तियाइं णो णिच्चं पूइयाइं णो णिच्चं पसत्थाइं णो णिच्चं अब्भणुण्णाताइं भवंति, तंजहा-वलतमरणे चेव वसट्टमरणे चेव १। एवं णियाणमरणे चेव तब्भवमरणे चेव २। गिरिपडणे चेव तरुपडणे चेव ३। जलप्पवेसे चेव जलणप्पवेसे चेव ४। विसभक्खणे चेव सत्थोवाडणे चेव ५।

दो मरणाइं जाव णो णिच्चं अब्भणुण्णाताइं भवंति, कारणेण पुण अप्पडिकुट्ठाइं, तंजहा-वेहाणसे चेव गिद्धपट्ठे चेव ६।

दो मरणाइं समणेणं भगवता महावीरेणं समणाणं निगंथाणं णिच्चं वन्नियाइं जाव अब्भणुण्णाताइं भवंति, तंजहा-पाओवगमणे चेव भत्तपच्चक्खाणे चेव ७। पाओवगमणे दुविहे पन्नत्ते, तंजहा-णीहारिमे चेव अनीहारिमे चेव, णियमं अपडिकम्मे ८। भत्तपच्चक्खाणे दुविहे पन्नत्ते, तंजहा-णीहारिमे चेव अणीहारिमे चेव, णियमं सपडिकम्मे ९।

११४. के अयं लोगे ? जीवच्चेव अजीवच्चेव । के अणंता लोए ? जीवच्चेव अजीवच्चेव । के सासया लोगे ? जीवच्चेव अजीवच्चेव ।

११५. दुविधा बोधी पन्नत्ता, तंजहा-णाणबोधी चेव दंसणबोधी चेव । दुविहा बुद्धा पन्नत्ता, तंजहा-णाणबुद्धा चेव दंसणबुद्धा चेव । एवं मोहे, मूढा ।

११६. णाणावरणिज्जे कम्मे दुविधे पन्नत्ते, तंजहा-देसणाणावरणिज्जे चेव सव्वणाणावरणिज्जे चेव । दरिसणावरणिज्जे कम्भे एवं चेव ।

वेयणिज्जे कम्मे दुविहे पन्नत्ते तंजहा-सातावेयणिज्जे चेव असातावेयणिज्जे चेव ।

मोहणिज्जे कम्मे दुविहे पन्नत्ते, तंजहा-दंसणमोहणिज्जे चेव चरित्तमोहणिज्जे चेव ।

आउए कम्मे दुविहे पन्नत्ते, तंजहा-अद्धाउए चेव भवाउए चेव ।

णामे कम्मे दुविहे पन्नत्ते, तंजहा-सुभणामे चेव असुभणामे चेव ।

गोत्ते कम्मे दुविहे पन्नत्ते, तंजहा-उच्चागोत्ते चेव णीयागोत्ते चेव ।

अंतराइए कम्मे दुविहे पन्नत्ते, तंजहा-पडुप्पन्नविणासिए चेव, पिहेति य आगामिपहं ।

११७. दुविहा मुच्छा पन्नत्ता, तंजहा-पेज्जवत्तिता चेव दोसवत्तिता चेव ।

पेज्जवत्तिता मुच्छा दुविहा पन्नत्ता, तंजहा-माया-चेव ।

दोसवत्तिता मुच्छा दुविहा पन्नत्ता, तंजहा-कोधे चेव माणे चेव ।

११८. दुविधा आराहणा पन्नत्ता, तंजहा-धम्मिताराहणा चेव केवलिराहणा चेव ।

धम्मियाराहणा दुविहा पन्नत्ता, तंजहा-अंतकिरिया चेव कप्पविमाणोववत्तिया चेव ।

११९. दो तित्थगरा नीलुप्पलसामा वण्णेणं पन्नत्ता, तंजहा-मुणिसुव्वते चेव अरिट्टनेमी चेव ।

दो तित्थगरा पियंगुसामा वण्णेणं पन्नत्ता, तंजहा-मल्ली चेव पासे चेव ।

दो तित्थयरा पउमगोरा वण्णेणं पन्नत्ता, तंजहा-पउमप्पहे चेव वासुपुज्जे चेव ।

दो तित्थगरा चंदगोरा वण्णेणं पन्नत्ता, तंजहा-चंदप्पभे चेव पुप्फदंते चेव ।

१२०. सच्चप्पवायपुव्वस्स णं दुवे वत्थू पन्नत्ता ।

१२१. पुव्वाभद्वयाणक्खत्ते दुतारे पन्नत्ते । उत्तराभद्वयाणक्खत्ते दुतारे पण्णत्ते ।  
एवं पुव्वा फग्गुणी उत्तरा फग्गुणी ।

१२२. अंतो णं मणुस्सखेत्तस्स दो समुद्धा पन्नत्ता, तंजहा-लवणे चेव कालोदे चेव ।

१२३. दो चक्कवट्ठी अपरिचत्तकामभोगा कालमासे कालं किच्चा अहेसत्तमाए पुढवीए अप्पतिट्ठाणे णरए णेरइयत्ताए, उववन्ना, तंजहा-सुभूमे चेव बंभदत्ते चेव ।

१२४. असुरिंदवज्जियाणं भवणवासीणं देवाणं देसूणाइं दो पलिओवमाइं ठिती पन्नत्ता १। सोहम्मे कप्पे देवाणं उक्कोसेणं दो सागरोवमाइं ठिती पन्नत्ता २। इसाणे कप्पे देवाणं उक्कोसेणं सातिरेगाइं दो सागरोवमाइं ठिती पन्नत्ता ३। सणंकुमारे कप्पे देवाणं जहन्नेणं दो सागरोवमाइं ठिती पन्नत्ता ४। माहिंदे कप्पे देवाणं जहन्नेणं साइरेगाइं दो सागरोवमाइं ठिती पन्नत्ता ५।

दोसु कप्पेसु कप्पित्थियाओ पन्नत्ताओ, तंजहा-सोहम्मे चेव ईसाणे चेव

१।

दोसु कप्पेसु देवा तेउलेस्सा पन्नत्ता, तंजहा-सोहम्मे चेव ईसाणे चेव २।

दोसु कप्पेसु देवा कायपरियारगा पन्नत्ता, तंजहा-सोहम्मे चेव ईसाणे चेव

३। दोसु कप्पेसु देवा फासपरियारगा पन्नत्ता, तंजहा-सणंकुमारे चेव माहिंदे चेव

४। दोसु कप्पेसु देवा रूवपरियारगा पन्नत्ता, तंजहा-बंभलोगे चेव लंतगे चेव

५। दोसु कप्पेसु देवा सहपरियारगा पन्नत्ता, तंजहा-महासुक्के चेव सहस्सारे चेव

६। दो इंदा मणपरियारगा पन्नत्ता, तंजहा-पाणते चेव अच्चुते चेव ७।

१२५. जीवा णं दुट्ठाणणिव्वत्तिते पोग्गले पावकम्मत्ताए चिणिंसु वा चिणंति वा

चिणिस्संति वा, तंजहा-तसकायनिव्वत्तिन्ने चेव थावरकायनिव्वत्तिते चेव

१। एवं उवचिणिंसु वा उवचिणंति वा उवचिणिस्संति वा २, बंधिंसु वा

बंधंति वा बंधिस्संति वा ३, उदीरिंसु वा उदीरंति वा उदीरिस्संति वा ४,

वेदेंसु वा वेदेंति वा वेदिस्संति वा ५, णिज्जरिंसु वा णिज्जरिंति वा

णिज्जरिस्संति वा ६।

१२६. दुपएसिता खंधा अणंता पण्णत्ता । दुपदेसोगाढा पोग्गला अणंता पन्नत्ता ।

एवं जाव दुगुणलुक्खा पोग्गला अणंता पण्णत्ता ।

॥४॥ दुट्ठाणं समत्तं ॥

तइयं अज्झयणं 'तिट्ठाणं'  
(पढमो उद्देसओ)

१२७. तयो इंदा पणत्ता, तंजहा-णामिंदे, ठवणिंदे, दव्विंदे ।  
तओ इंदा पन्नत्ता, तंजहा-णाणिंदे, दंसणिंदे, चरित्तिंदे ।  
तयो इंदा पन्नत्ता, तंजहा-देविंदे, असुरिंदे, मणुस्सिंदे ।
१२८. तिविहा विकुव्वणा पन्नत्ता, तंजहा-बाहिरते पोग्गले परियात्तिता एगा विकुव्वणा, बाहिरते पोग्गले अपरियात्तिता एगा विकुव्वणा, बाहिर पोग्गले परियात्तिता वि अपरियात्तिता वि एगा विकुव्वणा ।  
तिविहा विकुव्वणा पन्नत्ता, तंजहा-अब्भंतरए पोग्गले परियात्तिता एगा विकुव्वणा, अब्भंतरए पोग्गले अपरियात्तिता एगा विकुव्वणा, अब्भंतरए पोग्गले परियात्तिता वि अपरियात्तिता वि एगा विकुव्वणा ।  
तिविहा विकुव्वणा पन्नत्ता, तंजहा-बाहिरब्भंतरए पोग्गले परियात्तिता एगा विकुव्वणा, बाहिरब्भंतरए पोग्गले अपरियात्तिता एगा विकुव्वणा, बाहिरब्भंतरए पोग्गले परियात्तिता वि अपरियात्तिता वि एगा विकुव्वणा ।
१२९. तिविहा नेरइया पन्नत्ता, तंजहा-कतिसंचिता, अकतिसंचिता, अवत्तव्वगसंचिता । एवमेगिंदियवज्जा जाव वेमाणिया ।
१३०. तिविहा परियारणा पन्नत्ता, तंजहा-एगे देवे अन्ने देवे अन्नेसिं देवाणं देवीओ अभिजुंजिय २ परियारेति, अप्पणिजियाओ देवीओ अभिजुंजिय २ परियारेति, अप्पाणमेव अप्पणा विकुव्विय २ परियारेति । एगे देवे णो अन्ने देवे णो अन्नेसिं देवाणं देवीओ अभिजुंजिय २ परियारेति, अप्पणिजियाओ देवीओ अभिजुंजिय २ परियारेइ, अप्पाणमेव अप्पणा विकुव्विय २ परियारेति । एगे देव णो अन्ने देवे णो अन्ने देवे णो अन्नेसिं देवाणं देवीओ णो अप्पणिजियाओ (देवीओ अभिजुंजिय २ परितारेति), अप्पाणमेव अप्पणा विकुव्विय २ परियारेति ।
१३१. तिविहे मेहुणे पन्नत्ते, तंजहा-दिव्वे, माणुस्सते, तिरिक्खजोणीते ।  
तओ मेहुणे गच्छंति, तंजहा-देवा, मणुस्सा तिरिक्खजोणिता ।  
तओ मेहुणं सेवंति, तंजहा-इत्थी, पुरिसा, णपुंसगा ।



१३२. तिविहे जोगे पन्नत्ते, तंजहा-मणजोगे, वतिजोगे, कायजोगे । एवं णेरइयाईणं विगलिंदियवज्जाणं जाव वेमाणियाणं ।

तिविहे पओगे पन्नत्ते, तंजहा-मणपओगे, वतिपओगे, कायपओगे । जहा जोगो विगलिंदियवज्जाणं तथा पओगो वि ।

तिविहे करणे पन्नत्ते, तंजहा-मणकरणे, वतिकरणे, कायकरणे । एवं विगलिंदियवज्जं जाव वेमाणियाणं । तिविहे करणे पन्नत्ते, तंजहा-आरंभकरणे, संरंभकरणे, समारंभकरणे । निरंतरं जाव वेमाणियाणं ।

१३३. तिहिं ठाणेहिं जीवा अप्पाउयत्ताए कम्मं पगरेंति, तंजहा-पाणे अतिवातिता भवति, मुसं वतित्ता भवति, तहारूवं समणं वा माहणं वा अफासुएणं अणेसणिज्जेणं असण-पाण-खाइम-साइमेणं पडिलाभेत्ता भवति, इच्चेतेहिं तिहिं ठाणेहिं जीवा अप्पउयत्ताए कम्मं पगरेंति ।

तिहिं ठाणेहिं जीवा दीहाउयत्ताए कम्मं पगरेंति, तंजहा-णो पाणे अतिवातिता भवति, णो मुसं वतित्ता भवति, तहारूवं समणं वा माहणं वा फासुतेसणिज्जेणं असण-पाण-खाइम-साइमेणं पडिलाभेत्ता भवति, इच्चेतेहिं तिहिं ठाणेहिं जीवा दीहाउयत्ताए कम्मं पगरेंति ।

तिहिं ठाणेहिं जीवा असुभदीहाउयत्ताए कम्मं पगरेंति, तंजहा-पाणे अतिवातिता भवति, मुसं वतित्ता भवति, तहारूवं समणं वा माहणं वा हीलित्ता णिंदित्ता खिसित्ता गरहित्ता अवमाणित्ता अन्नयरेणं अमणुण्णेणं अपीतिकारतेणं असण-पाण-खाइम-साइमेणं पडिलाभित्ता भवति, इच्चेतेहिं तिहिं ठाणेहिं जीवा असुभदीहाउयत्ताए कम्मं पगरेंति ।

तिहिं ठाणेहिं जीवा सुभदीहाउयत्ताए कम्मं पगरेंति, तंजहा-णो पाणे अतिवातिता भवति, णो मुसं वदित्ता भवइ, तहारूवं समणं वा माहणं वा वंदित्ता नमंसित्ता सक्कारेत्ता सम्माणेत्ता कल्लाणं मंगलं देवतं चेतितं पज्जुवासेत्ता मणुण्णेणं पीतिकारणं असण-पाण-खाइम-साइमेणं पडिलाभेत्ता भवति, इच्चेतेहिं तिहिं ठाणेहिं जीवा सुभदीहाउयत्ताए कम्मं पगरेंति ।

१३४. ततो गुत्तीतो पन्नत्ताओ, तंजहा-मणुगुत्ती, वतिगुत्ती, कायगुत्ती ।

संजतमणुस्साणं ततो गुत्तीओ पण्णत्ताओ, तंजहा-मणगुत्ती, वइगुत्ती,

कायगुत्ती ।

तओ अगुत्तीओ पन्नत्ताओ, तंजहा-मणअगुत्ती, वइअगुत्ती, कायअगुत्ती । एवं नेरइताणं जाव थणियकुमाराणं, पंचिंदियतिरिक्खजोणियाणं असंजतमणुस्साणं वाणमंतराणं जोइसियाणं वेमाणियाणं ।

ततो दंडा पन्नत्ता, तंजहा-मणदंडे, वइदंडे, कायदंडे । (नेरइयाणं तओ दंडा पण्णत्ता, तंजहा-मणदंडे, वइदंडे, कायदंडे ।) विगलिंदियवज्जं जाव वेमाणियाणं ।

१३५. तिविहा गरहा पन्नत्ता, तंजहा-मणसा वेगे ग्रहति, वयसा वेगे ग्रहति, कायसा वेगे ग्रहति पावाणं कम्माणं अकरणयाए ।

अहवा गरहा तिविहा पन्नत्ता, तंजहा-दीहं पेगे अद्धं ग्रहति, रहस्सं पेगे अद्धं ग्रहति, कायं पेगे पडिसाहरति पावाणं कम्माणं अकरणयाए ।

१३६. तिविहे पच्चक्खाणे पन्नत्ते, तंजहा-मणसा वेगे पच्चक्खाति, वयसा वेगे पच्चक्खाति । एवं जथा गरहा तथः पच्चक्खाणे वि दो आलावगा भामितव्वा ।

१३७. ततो रुक्खा पन्नत्ता, तंजहा-पत्तोवते, पुप्फोवते, फलोवते । एवामेव ततो पुरिसज्जाता पन्नत्ता, तंजहा-पत्तोवारुक्खसामाणे, पुप्फोवारुक्खसामाणे, फलोवारुक्खसामाणे ।

ततो पुरिसज्जाता पन्नत्ता, तंजहा-नामपुरिसे, ठवणपुरिसे, दव्वपुरिसे १।

ततो पुरिसज्जाया पन्नत्ता, तंजहा-नाणपुरिसे, दंसणपुरिसे, चरित्तपुरिसे २।

तओ पुरिसज्जाता पन्नत्ता, तंजहा-वेदपुरिसे, चिंधपुरिसे, अभिलावपुरिसे ३।

तिविहा पुरिसा पन्नत्ता, तंजहा-उत्तमपुरिसा, मज्झिमपुरिसा, जहन्नपुरिसा ४।

(१) उत्तमपुरिसा तिविहा पन्नत्ता, तंजहा-धम्मपुरिसा, भोगपुरिसा, कम्मपुरिसा । धम्मपुरिसा अरहंता भोगपुरिसा चक्रवट्ठी, कम्मपुरिसा वासुदेवा ५।

(२) मज्झिमपुरिसा तिविधा पन्नत्ता, तंजहा-उग्गा, भोगा, राइन्ना ६।

(३) जहन्नपुरिसा तिविहा पन्नत्ता, तंजहा-दासा, भयगा, भातिल्लगा ७।

१३८. तिविधा मच्छा पन्नत्ता, तंजहा-अंडया, पोतया, संमुच्छिमा । अंडया मच्छा तिविहा पन्नत्ता, तंजहा-इत्थी, पुरिसा, णपुंसगा । पोतया मच्छा तिविहा

पन्नत्ता, तंजहा-इत्थी, पुरिसा, णपुंसगा ।

तिविधा पक्खी पन्नत्ता, तंजहा-अंडया पोतया, संमुच्छिमा । अंडया पक्खी तिविधा पन्नत्ता, तंजहा-इत्थी, पुरिसा, णपुंसगा । पोतजा पक्खी तिविधा पन्नत्ता, तंजहा-इत्थी, पुरिसा, णपुंसगा ।

एवमेतेणं अभिलावेणं उरपरिसप्पा वि भाणियव्वा, भुजपरिसप्पा वि भामियव्वा ।

१३९. (१) एवं चेव तिविहाओ इत्थीओ पन्नत्ताओ, तंजहा-तिरिक्खजोणियाओ, मणुस्सित्थीओ, देवित्थीओ । तिरिक्खजोणित्थीओ तिविधातो पन्नत्ताओ, तंजहा-जलचरीओ, थलचरीओ, खहचरीओ । मणुस्सित्थीओ तिविधाओ पन्नत्ताओ, तंजहा-कम्मभूमियाओ, अकम्मभूमियाओ, अंतरदीविगाओ ।

(२) तिविधा पुरिसा पन्नत्ता, तंजहा-तिरिक्खजोणियपुरिसा, मणुस्सपुरिसा, देवपुरिसा १। तिरिक्खजोणियपुरिसा, तिविधा पन्नत्ता, तंजहा-जलचरा, थलचरा, खहचरा २। मणुस्सपुरिसा तिविधा पन्नत्ता, तंजहा-कम्मभूमया, अकम्मभूमया, अंतरदीवगा ।

(३) तिविधा नपुंसगा पन्नत्ता, तंजहा-णेरतियनपुंसगा, तिरिक्खजोणियनपुंसगा, मणुस्सनपुंसगा १। तिरिक्खजोणियनपुंसगा तिविधा पन्नत्ता, तंजहा-जलचरा, थलचरा, खहचरा २। मणुस्सनपुंसगा तिविधा पन्नत्ता, तंजहा-कम्मभूमगा, अकम्मभूमगा, अंतरदीवगा ।

(४) तिविहा तिरिक्खजोणिया पन्नत्ता, तंजहा-इत्थी, पुरिसा, नपुंसगा ।

१४०. नेरइयाणं तओ लेस्सातो पन्नत्ताओ, तंजहा-कण्हलेसा नीललेसा काउलेसा । असुरकुमाराणं ततो लेस्साओ संकिलिद्धाओ पन्नत्ताओ, तंजहा-कण्हलेसा नीललेसा काउलेसा, एवं जाव थणियकुमाराणं, एवं पुढविकाइयाणं, आउ-वणस्सतिकाइयाण वि । तेउकाइयाणं वाउकाइयाणं बेइंदियाणं तेइंदियाणं चउरिंदियाणं तओ लेस्सा जथा नेरइयाणं । पंचेंदियतिरिक्खजोणियाणं तओ लेस्साओ संकिलिद्धाओ पन्नत्ताओ, तंजहा-कण्हलेसा नीललेसा काउलेसा । पंचेंदियतिरिक्खजोणियाणं तओ लेसाओ असंकिलिद्धाओ पन्नत्ताओ, तंजहा-तेउलेसा पण्हलेसा सुक्कलेसा, एवं

मणुस्साण वि । वाणमंतराणं जथा असुरकुमाराणं । वेमाणियाणं तओ लेस्साओ पन्नत्ताओ, तंजहा-तेउलेसा पम्हलेसा सुक्कलेसा ।

१४१. तिहिं ठाणेहिं तारारूवे चलेज्जा, तंजहा-विकुव्वमाणे वा, परियारेमाणे वा, ठाणातो वा ठाणं संकममाणे तारारूवे चलेज्जा ।

तिहिं ठाणेहिं देवे विज्जुतारं करेज्जा, तंजहा-विकुव्वमाणे वा, परियारेमाणे वा, तहारूवस्स समणस्स वा माहणस्स वा इड्ढिं जुतिं जसं बलं वीरियं पुरिसगारपरक्कमं उवदंसेमाणे देवे विज्जुतारं करेज्जा ।

तिहिं ठाणेहिं देवे थणियसदं करेज्जा, तंजहा-विकुव्वमाणे, एवं जहा विज्जुतारं तहेव थणितसदं पि ।

१४२. तिहिं ठाणेहिं लोगंधयारे सिया, तंजहा-अरहंतेहिं वोच्छिज्जमाणेहिं, अरहंतपण्णत्ते धम्मे वोच्छिलज्जमाणे, पुव्वगते वोच्छिज्जमाणे १।

तिहिं ठाणेहिं लोगुज्जोते सिया, तंजहा-अरहंतेहिं जायमाणेहिं, अरहंतेसु पव्वयमाणेसु, अरहंताणं णाणुप्पयमहिमासु २।

तिहिं ठाणेहिं देवगंधारे सिया, तंजहा-अरहंतेहिं वोच्छिज्जमाणेहिं, अरहंतपण्णत्ते धम्मे वोच्छिज्जमाणे, पुव्वगते वोच्छिज्जमाणे ३।

तिहिं ठाणेहिं देवुज्जोते सिया, तंजहा-अरहंतेहिं जायमाणेहिं, अरहंतेहिं पव्वयमाणेहिं, अरहंताणं णाणुप्पयमहिमासु ४।

तिहिं ठाणेहिं देवसंनिवाए सिया तंजहा-अरहंतेहिं जायमाणेहिं, अरहंतेहिं पव्वयमाणेहिं, अरहंताणं नाणुप्पयमहिमासु ५, एवं देवुक्कलिता ६, देवकहकहए ७।

तिहिं ठाणेहिं देविंदा माणुसं लोगं हव्वमागच्छंति, तंजहा-अरहंतेहिं जायमाणेहिं, अरहंतेहिं पव्वयमाणेहिं, अरहंताणं णाणुप्पयमहिमासु ८। एवं सामाणिया ९, तायत्तीसगा १०, लोगपाला देवा ११, अग्गमहिसीओ देवीओ १२, परिसोववन्नगा देवा १३, अणियाधिपती देवा १४, आतरक्खा देवा १५, माणुसं लोगं हव्वमागच्छंति ।

तिहिं ठाणेहिं देवा अब्भुट्टेज्जा, तंजहा-अरहंतेहिं जायमाणेहिं जाव ते चेव १, एवमासणाइं चलेज्जा २, सीहणातं करेज्जा ३, चेलुक्खेवं करेज्जा ४। तिहिं ठाणेहिं देवाणं चेतितरुक्खा चलेज्जा, तंजहा-अरहंतेहिं तं चेव ५।

तिहिं ठाणेहिं लोगंतिया देवा माणुसं लोगं हव्वमागच्छेज्जा, तंजहा-अरहंतेहिं जायमाणेहिं, अरहंतेहिं पव्वयमाणेहिं, अरहंताणं णाणुप्पयमहिमासु ।

१४३. तिण्हं दुप्पडियारं समणाउसो, तंजहा-अम्मापिउणो, भट्टिस्स, धम्मायरियस्स ।

(१) संपातो वि य णं केति पुरिसे अम्मापियरं सयपागसहस्सपागेहिं तेह्लेहिं अब्भंगेत्ता सुरभिणा गंधट्टएणं उव्वट्टित्ता तिहिं उदगेहिं मज्जावित्ता सव्वालंकारविभूसियं करेत्ता मणुणं थालीपागसुद्धं अट्टारसवंजणाउलं भोयणं भोयावेत्ता जावज्जीवं पिट्ठिवडेंसियाए परिवहेज्जा, तेणावि तस्स अम्मापिउस्स दुप्पडियारं भवइ । अहे णं से तं अम्मापियरं केवलिपण्णत्ते धम्मे आघवइत्ता पन्नवइत्ता परूवइत्ता ठावइत्ता भवति तेणामेव तस्स अम्मापिउस्स सुप्पडितारं भवति समणाउसो !

(२) केति महच्चे दरिदं समुक्कसेज्जा, तते णं से दरिदे समुक्किट्ठे समाणे पच्छा पुरं च णं विउलभोगसमितिसमन्नागते यावि विहरेज्जा, तते णं से महच्चे अन्नदा कयाइ दरिदीहूते समाणे तस्स दरिदस्स अंतिए हव्वमागच्छेज्जा, तते णं से दरिदे तस्स भट्टिस्स सव्वस्समवि दलयमाणे तेणावि तस्स दुप्पडियारं भवति । अहे णं से तं भट्टिं केवलिपण्णत्ते धम्मे आघवइत्ता पन्नवइत्ता परूवइत्ता ठावइत्ता भवति तेणामेव तस्स भट्टिस्स सुप्पडियारं भवति ।

(३) केति तहारूवस्स समणस्स वा माहणस्स वा अंतियं एगमवि आरियं धम्मियं सुवयणं सोच्चा निस्सम्म कालमासे कालं किच्चा अन्नयेरेसु देवलोगेसु देवत्ताए उववन्ने, तते णं से देवे तं धम्मायरियं दुब्भिक्खातो वा देसातो सुभिक्खं देसं साहरेज्जा, कंतारातो वा णिकंतारं करेज्जा, दीहकालिएणं वा रोगातंकेण अभिभूतं समाणं विमोएज्जा, तेणावि तस्स धम्मायरियस्स दुप्पडियारं भवति । अथे णं से तं धम्मायरियं केवलिपण्णत्ताओ धम्मातो भट्टं समाणं भुज्जो वि केवलिपण्णत्ते धम्मे आघवत्तिता जाव ठावत्तिता भवति तेणामेव तस्स धम्मायरियस्स सुप्पडियारं भवति ।

१४४. तिहिं ठाणेहिं संपन्ने अणगारे अणादीयं अणवदगं दीहमद्धं चाउरंतं संसारकंतारं वीतीवतेज्जा, तंजहा-अणिदाणयाए दिट्ठिसंपन्नयाए जोगवाहियाए ।

१४५. तिविहा ओसप्पिणी पन्नत्ता, तंजहा-उक्कस्सा मज्झिमा जहन्ना १, एवं छप्पि

समाओ भाणियव्वाओ जाव दूसमदूसमा ७।

तिविहा उस्सप्पिणी पन्नत्ता, तंजहा-उक्कस्सा मज्झिमा जहन्ना ८, एवं छप्पि समाओ भाणियव्वाओ जाव सुसमसुसमा १४।

१४६. तिहिं ठाणेहिं अच्छिन्ने पोग्गले चलेज्जा, तंजहा-आहारिज्जमाणे वा पोग्गले चलेज्जा, विकुव्वमाणे वा पोग्गले चलेज्जा, ठाणातो वा ठाणं संकामिज्जमाणे पोग्गले चलेज्जा १।

तिविधे उवधी पन्नत्ते, तंजहा-कम्मोवही सरीरोवही बाहिरभंडमत्तोवही । एवं असुरकुमाराणं भाणियव्वं, एवं एगिंदियनेरइयव्रज्जं जाव वेमाणियाणं २।

अहवा तिविधे उवधी पन्नत्ते, तंजहा-सचित्ते अचित्ते मीसए । एवं णेरइयाणं निरंतरं जाव वेमाणियाणं ३।

तिविधे परिग्गहे पन्नत्ते, तंजहा-कम्मपरिग्गहे सरीरपरिग्गहे बाहिरभंडमत्तपरिग्गहे । एवं असुरकुमाराणं, एवं एगिंदियनेरतियव्रज्जं जाव वेमाणियाणं ४।

अहवा तिविधे परिग्गहे पन्नत्ते, तंजहा-सचित्ते अचित्ते मीसए । एवं नेरतियाणं निरंतरं जाव वेमाणियाणं ५।

१४७. तिविधे पणिधाणे पन्नत्ते, तंजहा-मणपणिहाणे वइपणिहाणे कायपणिहाणे । एवं पंचेंदियाणं जाव वेमाणियाणं ।

तिविधे सुप्पणिधाणे पन्नत्ते, तंजहा-मणसुप्पणिहाणे वइसुप्पणिहाणे कायसुप्पणिहाणे । संजतमणुस्साणं तिविधे सुप्पणिहाणे पन्नत्ते, तंजहा-मणसुप्पणिहाणे वइसुप्पणिहाणे कायसुप्पणिहाणे ।

तिविधे दुप्पणिहाणे पन्नत्ते, तंजहा-मणदुप्पणिहाणे वइदुप्पणिहाणे कायदुप्पणिहाणे । एवं पंचेंदियाणं जाव वेमाणियाणं ।

१४८. तिविधा जोणी पन्नत्ता, तंजहा-सीता उसिणा सीओसिणा । एवं एगिंदियाणं विगलिंदियाणं तेउकाइयवज्जाणं संमुच्छिमपंचेंदियतिरिक्खजोणियाणं संमुच्छिममणुस्साण य ।

तिविहा जोणी पन्नत्ता, तंजहा-सचित्ता अचित्ता मीसिता । एवं एगेंदियाणं विगलिंदियाणं संमुच्छिमपंचेंदियतिरिक्खजोणियाणं संमुच्छिममणुस्साण य ।

तिविधा जोणी पन्नत्ता, तंजहा-संवुडा वियडा संवुडवियडा ।

तिविधा जोणी पन्नत्ता, तंजहा-कुम्मुन्नत्ता संखावत्ता वंसीवत्तिया । कुम्मुन्नता णं जोणी उत्तमपुरिसमाऊणं, कुम्मुन्नताते णं जोणीते तिविहा उत्तमपुरिसा गब्भं वक्कमंति, तंजहा-अरहंता, चक्कवट्टी, बलदेव-वासुदेवा । संखावत्ता णं जोणी इत्थीरयणस्स, संखावत्ताते णं जोणीते बहवे जीवा य पोगगला य वक्कमंति विउक्कमंति चयंति उववज्जंति, नो चेव णं निप्फज्जंति । वंसीवत्तिया णं जोणी पिहज्जणस्स, वंसीवत्तियाते णं जोणीते बहवे पिहज्जणे गब्भं वक्कमंति ।

१४९. तिविहा तणवणस्सतिकाइया पन्नत्ता, तंजहा-संखेज्जजीविता असंखेज्जजीविता अणंतजीविता ।

१५०. जंबुद्दीवे दीवे भारहे वासे तओ तित्था पन्नत्ता, तंजहा-मागहे वरदामे पभासे, एवं एरवए वि । जंबुद्दीवे दीवे महाविदेहे वासे एगभेगे चक्कवट्टिविजये ततो तित्था पन्नत्ता, तंजहा-मागधे वरदामे पभासे ३। एवं धायइसंडे दीवे पुरत्थिमद्धे वि ३, पच्चत्थिमद्धे वि ३, पुक्खरवरदीवट्टपुरत्थिमद्धे वि ३, पच्चत्थिमद्धे वि ३।

१५१. जंबुद्दीवे दीवे भरहेरवतेसु वासेसु तीताते उस्सप्पिणीते सुसमाए समाते तिन्नि सागरोवमकोडाकोडीओ कालो होत्था १। एवं ओसप्पिणीते, नवरं पण्णत्ते २। आगमेस्साते उस्सप्पिणीते भविस्सति ३। एवं धायइसंडे पुरत्थिमद्धे पच्चत्थिमद्धे वि ९, एवं पुक्खरवरदीवट्ट पुरत्थिमद्धे पच्चत्थिमद्धे वि कालो भाणियव्वो १५।

जंबुद्दीवे दीवे भरहेरवतेसु वासेसु तीताते उस्सप्पिणीते सुसमसुसमाते समाए मणुया तिन्नि गाउयाइं उट्ठुच्चत्तेणं तिन्नि पलिओवमाइं परमाउं पालयित्था, एवं इमीसे ओसप्पिणीते, आगमेस्साते उस्सप्पिमीते । जंबूदीवे दीवे देवकुरुउत्तरकुरासु मणुया तिन्नि गाउयाइं उट्ठुच्चत्तेणं पन्नत्ता, तिन्नि पलिओवमाइं परमाउं पालयंति, एवं जाव पुक्खरवरदीवट्टपच्चत्थिमद्धे ।

१५२. जंबूदीवे दीवे भरहेरवतेसु वासेसु एगमेगाते ओसप्पिणउस्सप्पिणीते तओ वंसा उप्पज्जिंसु वा उप्पज्जंति वा उप्पज्जिस्संति वा, तंजहा-अरहंतवंसे चक्कवट्टिवंसे दसारवंसे, एवं जाव पुक्खरवरदीवट्टपच्चत्थिमद्धे ।

जंबूदीवे दीवे भरहेरवतेसु वासेसु एगमेगाते ओसप्पिणी-उस्सप्पिणीए तओ उत्तमपुरिसा उप्पजिंसु वा उप्पज्जंति वा उप्पजिस्संति वा, तंजहा-अरहंता चक्कवट्टी बलदेव-वासुदेवा, एवं पुक्खरवरदीवड्डपच्चत्थिमद्धे । तओ अहाउयं पालयंति, तंजहा-अरहंता चक्कवट्टी बलदेव-वासुदेवा । तओ मज्झिममाउयं पालयंति, तंजहा-अरहंता चक्कवट्टी बलदेव-वासुदेवा ।

१५३. बादरतेउकाइयाणं उक्कोसेणं तिन्नि राइंदियाइं ठिती पन्नत्ता । बादरवाउकाइयाणं उक्कोसेणं तिन्नि वाससहस्साइं ठिती पन्नत्ता ।

१५४. अह भंते ! सालीणं वीहीणं गोधूमाणं जवाणं जवजवाणं एतेसि णं धन्नाणं कोट्टाउत्ताणं पल्लाउत्ताणं मंचाउत्ताणं मालाउत्तामं ओलित्ताणं लित्ताणं लंछियाणं मुद्दियाणं पिहिताणं केवतितं कालं जोणी संचिद्धति ? गोयमा ! जहन्नेणं अंतोमुहुत्तं, उक्कोसेणं तिण्णि संवच्छराइं, तेण परं जोणी पमिलायति, तेण परं जोणी पविद्धंसति, तेण परं जोणी विद्धंसति, तेण परं बीए अबीए भवति, तेण परं जोणोवोच्छेदे पन्नत्ते ।

१५५. दोच्चाते णं सक्करप्पभाते पुढवीते णेरइयाणं उक्कोसेणं तिण्णि सागरोवमाइं ठिती पन्नत्ता । तच्चाते णं वालुयप्पभाते पुढवीते जहन्नेणं णेरइयाणं तिन्नि सागरोवमाइं ठिती पण्णत्ता ।

पंचमाए णं धूमप्पभाए पुढवीए तिन्नि निरयावाससतसहस्सा पन्नत्ता ।

तिसु णं पुढवीसु नेरइया उसिणवेयणा पन्नत्ता, तंजहा-पढमाते दोच्चाते तच्चाते । तिसु णं पुणवीसु णेरतिया उसिणं वेयणं पच्चणुभवमाणा विहरंति, तंजहा-पढमाते दोच्चाते तच्चाते ।

१५६. तओ लोगे समा सपक्खिं सपडिदिसिं पन्नत्ता, तंजहा-अप्पतिट्ठाणे णरए, जंबूदीवे दीवे, सव्वट्ठसिद्धे महाविभाणे ।